



Broj: 01/1-02-2702/20
Ilijaš, 06.01.2020. godine

Z A P I S N I K

sa 1. Konstituirajuće sjednice Općinskog vijeća Ilijaš, održane dana 06.01.2021. godine, sa početkom u 10:00h.

Konstituirajućom sjednicom Općinskog vijeća Ilijaš predsjedavala je predsjedavajuća Općinskog vijeća g-đa Alma Omerović.

Prisutni vijećnici:

RB.	IME I PREZIME
	SDA
1	ALMA OMEROVIĆ
2	ANEL BUMBULOVIĆ
3	MEHMED SINANOVIĆ
4	ELMA MASNOPITA
5	ALEN HASKOVIĆ
6	ALEN ARNAUTOVIĆ
7	ADEM ALIĆ
8	HALID DIZDAREVIĆ
9	-
10	KENAN HASIĆ
11	SEMIĆ DEDIĆ
12	DENIS DILBEROVIĆ
	NIP
13	VERNESA BEŠLIJA
14	ALMIR ŠPIODIĆ
15	KENAN BUZA
16	DINO ČUSTOVIĆ
17	ADNAN ABADŽIJA
18	AMINA RAMIĆ
19	MEHO HIDO
20	ALEMA DŽAFO
	SDP
21	ALAN ŠERAK
22	ANELA SUBAŠIĆ
23	SELMA BARIĆ
	SBB
24	AKIF BEŠLIJA
25	MUHAMED HANDŽIĆ

Odsutni vijećnik:

1. Seid Bektić

Prisutni gosti:

1. Aida Muratović - Radio Ilijaš
2. Amar Muftić - volonter

Ostali prisutni:

1. Akif Fazlić – općinski načelnik
2. Nijaz Spahić – pomoćnik načelnika
3. Ilda Kahrman – sekretar OV-a Ilijaš
4. Admir Dervišević - viši referent za popunu i mobilizaciju struktura, mjere zaštite i obuku
5. Dženan Suša – IT administrator
6. Maida Habibović – zapisničar

Prije početka sjednice predsjedavajuća je predložila da neko iz IT sektora ili sekretar OV-a da kratko uputstvo vezano za korištenje tehničke opreme (tokeni, mikrofoni) u sali.

ILDA KAHRIMAN - sekretar OV-a

Objasnila je način korištenja tokena prilikom glasanja, kao i ostale pojedinosti vezano za tehničku opremu.

ALMA OMEROVIĆ - predsjedavajuća

Otvorila je sjednicu i konstatovala da su prisutna 24 vijećnika, te da postoji kvorum za odlučivanje.

Prije predlaganja dnevnog reda, predlažem da sekretar OV-a uruči Uvjerenja o dodjeli mandata vijećnicima što je OV-e i prihvatilo.

Nakon preuzimanja Uvjerenja, predsjedavajuća je pročitala predloženi dnevni red.

Primjedbi na predloženi dnevni red nije bilo, pa je OV-e jednoglasno usvojilo slijedeći

DNEVNI RED

1. Informacija o potvrđivanju rezultata na Lokalnim izborima 2020. godine za Općinsko vijeće i općinskog načelnika Općine Ilijaš
2. Svečane izjave novoizabranih vijećnika
3. a) Prijedlog Odluke o obrazovanju Komisije za izbor i imenovanja
b) Prijedlog Rješenja o izboru članova Komisije za izbor i imenovanja
c) Izbor Komisije za provođenje izbora za predsjedavajućeg i zamjenika predsjedavajućeg Općinskog vijeća Ilijaš
4. Izbor:
a) predsjedavajućeg Općinskog vijeća Ilijaš
b) zamjenika predsjedavajućeg Općinskog vijeća Ilijaš
c) svečana izjava novoizabranog predsjedavajućeg i zamjenika predsjedavajućeg Općinskog vijeća Ilijaš
5. Odluka o utvrđivanju prestanka mandata nosilaca funkcija u prethodnom mandatu Općinskog vijeća:
a) predsjedavajućeg Općinskog vijeća Ilijaš

b) zamjenika predsjedavajućeg Općinskog vijeća Ilijaš

AD-1

Informacija o potvrđivanju rezultata na Lokalnim izborima 2020. godine
za Općinsko vijeće i općinskog načelnika Općine Ilijaš

ALMA OMEROVIĆ - predsjedavajuća

Pročitala je Informaciju kako slijedi:

Centralna izborna komisija Bosne i Hercegovine je na svojoj 106. sjednici održanoj 15.12. 2020. godine, donijela Odluku o potvrđivanju i objavljivanju rezultata Lokalnih izbora u Bosni i Hercegovini 2020. godine broj: 05-1-07-1-2100-1/20.

Navedena Odluka stupila je na snagu danom donošenja i ista će biti objavljena u "Službenom glasniku BiH", "Službenom glasniku RS", "Službenim novinama F BiH", "Službenom glasniku Brčko distrikta" i internet stranici Centralne izborne komisije BiH www.izbori.ba i sredstvima javnog informisanja. Sastavni dio ove Odluke je Izvještaj o rezultatima glasanja za svaki izborni nivo iz člana 1. stav (1) tačka a), b), c), d), e), f) i g) ove Odluke, sa raspodjeljenim mandatima i imenima kandidata unutar političkih subjekata.

Od 2 kandidata za Načelnika Općine Ilijaš, izabran je Akif Fazlić kandidat SDA sa 5023 glasa ili 50,23% svih važećih glasova.

Mandati za Općinsko vijeće dodijeljeni su kako slijedi:

SDA-Stranka demokratske akcije	- 12 mandata
NIP-Narod i pravda	- 8 mandata
SDP-Socijaldemokratska partija BiH	- 3 mandata
SBB-Fahrudin Radončić	- 2 mandata

Mandati vijećnika po političkim subjektima dodijeljeni su kako slijedi:

SDA – Stranka demokratske akcije

1. Omerović Alma
2. Bumbulović Anel
3. Sinanović Mehmed
4. Masnopita Elma
5. Hasković Alen
6. Arnautović Alen
7. Alić Adem
8. Dizdarević Halid
9. Bektić Seid
10. Hasić Kenan
11. Dedić Semir
12. Dilberović Denis

NIP - Narod i pravda

1. Bešlija Vernesa
2. Špiodić Almir
3. Buza Kenan
4. Čustović Dino
5. Abadžija Adnan
6. Ramić Amina
7. Hido Meho
8. Džafo Alema

SDP – Socijaldemokratska partija Bosne i Hercegovine

1. Šerak Alan
2. Subašić Anela
3. Barić Selma

SBB-SAVEZ ZA BOLJU BUDUĆNOST

1. Bešlija Akif
2. Handžić Muhamed

Dakle, ovo je novi saziv Vijeća za mandatni period 2020.-2024. godina.

Još uvijek u ulozi predsjedavajuće, iskoristit ću priliku da čestitam našem kandidatu, odnosno sada već izabranom načelniku općine Ilijaš i želim mu puno sreće i uspjeha u radu. Svakako želim i kolegama i vijećnicima puno sreće i uspjeha i vjerujem da ćemo donositi najbolje odluke za sve građane općine Ilijaš. Kao žena, na poziciji predsjedavajuće, a vjerujem da mi muške kolege neće zamjeriti, želim posebne čestitke da uputim ženama kolegicama i drago mi je da u ovom sastavu Vijeća ima veći broj žena nego je to bilo prethodno.

Otvaram raspravu po pitanju ove tačke dnevnog reda, a za riječ se javio načelnik, izvolite.

ALAN ŠERAK - vijećnik SDP-a (poslovnička intervencija)

Ne vidim prostora kako da se obrati pod prvom tačkom dnevnog reda uvaženi načelnik.

ALMA OMEROVIĆ - predsjedavajuća

Prva je tačka dnevnog reda je Informacija i otvorili smo raspravu po istoj.

ALAN ŠERAK - vijećnik SDP-a (poslovnička intervencija)

Prema Poslovniku o radu OV-a Ilijaš vi ste dužni da pročitate Informaciju i mi tu Informaciju primimo k znanju i to je to.

ALMA OMEROVIĆ - predsjedavajuća

Mislim da je sasvim kolegijalno da se načelnik obrati Vijeću, a i vi ako želite nije nikakav problem.

ALAN ŠERAK - vijećnik SDP-a (poslovnička intervencija)

Naravno da želim, ali mi ćemo se držati utvrđenog dnevnog reda, a uvaženi načelnik se trebao obratiti prije usvajanja dnevnog reda. Trebali ste ga prozvati i to je vaša greška što niste, pa prema tome žao mi je, ali ja ne vidim prostora ovdje da se načelnik može obratiti po bilo kojoj tački dnevnog reda.

ALEN HASKOVIĆ - vijećnik SDA

Kolega Šerak, mi smo i prije primali razne Informacije k znanju sa mogućnošću diskusije po tim Informacijama. O Informacijama ne glasamo, u konačnici ih primamo k znanju, ali diskusija za određene Informacije je dozvoljena.

ALAN ŠERAK - vijećnik SDP-a (replika)

Zahvaljujem Haskoviću da si rekao ovo što si rekao, međutim, veze s vezom nema to što ti govoriš prijatelju. Tačka se zove "Informacija o potvrđivanju rezultata na Lokalnim izborima 2020. godine za Općinsko vijeće i općinskog načelnika Općine Ilijaš" i Poslovnik je jasno i decidno napisao kako te stvari funkcionišu. Načelnik općine Ilijaš, prije samog rada današnje sjednice trebao je da izađe fino za govornicu, da nam se obrati i poželi sreću u radu i on je tu trebao da završi. To što vi niste znali, to je nešto drugo i vi ste mu tu mogućnost uskratili, a ne ja.

Dakle, ako nisam bio jasan, ovaj dnevni red, ove tačke dnevnog reda ne daju prostora Akifu Fazliću da se sada ovdje obrati. Druga je stvar da li mi želimo da ga pustimo da se obrati, da prekršimo proceduru, ali evo ja ne želim.

ALMIR ŠPIODIĆ - vijećnik NIP-a

Po pitanju ove tačke dnevnog reda, ja bih da sa držimo Statuta Općine Ilijaš i Poslovnika o radu OV-a. U Statutu član 54. glasi: "Nespojive su funkcije općinskog načelnika, odnosno općinskog službenika i namještenika sa funkcijom općinskog vijećnika".

Općinski načelnik se može obratiti, osim ako nije prihvatio mandat načelnika da se obrati u svojstvu vijećnika. Znači, tako bi bilo po Statutu Općine Ilijaš. Može se obratiti, ako će nam umjesto predsjednika Općinske izborne komisije Ilijaš dati Informaciju o provedenim Lokalnim izborima u proteklom periodu.

ALAN ŠERKA - vijećnik SDP-a (replika)

To će svakako biti na drugoj sjednici Općinskog vijeća kada će nam uvaženi predsjednik OIK-a vjerovatno ovdje doći ako ima imalo obraza pa da nam se obrati nakon svega što je prouzrokovao i kompromitirao cijeli izborni proces.

Ovo je formalno-pravno korektno urađeno. Dakle, Informacija o potvrđivanju rezultata na Lokalnim izborima 2020. godine za Općinsko vijeće i općinskog načelnika Općine Ilijaš. U Poslovniku, opet ću napomenuti, predsjedavajuća je bila ta koja je ovu Informaciju trebala da saopšti i ona je to uradila sasvim korektno. Prema tome, vi treba da zaključite prvu tačku dnevnog reda i da mi nastavimo sa radom, jer nepotrebno gubimo vrijeme i bojim se da ako ovako nastavimo, nećemo do večeras završiti.

HALID DIZDAREVIĆ - vijećnik SDA

Kolega Šeraka s jedne strane ima pravo, međutim, najnormalnije bi bilo da se prvo Informacija predoči, pa da se nakon predočene informacije ko je sve dobio mandat, da se načelnik obrati, a ne prije Informacije. Dakle, otprilike u tom nekom pravcu smo išli i korektno bi bilo da se načelnik obrati, jer je ovo Konstituirajuća sjednica.

MUHAMED HANDŽIĆ - vijećnik SBB-a

Neću komentarisati postupke kolega sa moje desne niti sa lijeve strane, ali bilo bi korektno kada preuzmemo mandate da se jedni drugima zahvalimo u ime Klubova i evo ja se zahvaljujem u ime KV SBB-a. Također, očekujem to i od kolega iz SDA, NIP-a i SDP-a i na kraju i od načelnika općine Akifa Fazlića. Bilo bi korektno da dozvolimo jedni drugima da čestitamo jedni drugima na dodjeli mandata, a imat ćemo vremena, četiri godine su pred nama, da se bavimo i replikama i ograničenjima i bilo šta da dođe na dnevni red to ćemo zajednički rješavati, mislim, u korektnom odnosu.

Još samo da zamolim tehničku službu za obezbjeđivanje rada Općinskog vijeća da nam postavi mikrofone da ja i kolega Akif Bešlija, možda niste računa na nas u ovom Vijeću, ali na vašu sreću ili nesreću mi smo još tu, možemo s mjesta diskutovati, a ne da izlazimo za govornicu.

ADNAN ABADŽIJA - vijećnik NIP-a

Ispred KV NIP-a čestitam načelniku i ostalim izabranim kolegama na mandatima i želim nam svima da budemo korektni onako kako to dolikuje obrazovanim ljudima i naravno želim da vas prati zdravlje i sreća.

ALMA OMEROVIĆ - predsjedavajuća

Ukoliko se niko više od vijećnika ne javlja, riječ dajem općinskom načelniku.

ALAN ŠERAK - vijećnik SDP-a

Ono sve o čemu ja ovdje pričam, ti to ovdje kao želiš da derogiraš. Ja sve vrijeme ovdje Vama ukazujem na poslovničke procedure i fino Vam citiram taj neki tamo član gdje se kaže kako neke stvari stoje. I nakon svega toga Vi ćete to kao čuti, presjeći i dati njemu riječ. Vjerujte mi da nećete. Ako treba danas prekinut sjednicu Vijeća, vrlo radu ću to uraditi. Ali dozvoliti da se neko na taj način sa mnom igra, vjerujte da neće. Dakle, tvoj problem kako si koncipirala dnevni red jeste što nisi načelniku dala da se obrati na početku sjednice. To i jeste praksa bila. Glasali ste za dnevni red i sada u okviru postojećeg dnevnog reda želite da nađete mehanizam kako njemu dati riječ. Pa ne može tako ljudi. Ili ćemo poštovati procedure ili ih nećemo poštovati. Ako želite da ih ne poštujemo, onda recite nećemo ih poštovati, ali onda se uvodimo u neku drugu vrstu dimenzije, a tek krećemo sa ovim mandatom. Ja vam to ne bih preporučio vjerujte. Ali eto, ako je to mrtvo slovo na papiru da se Akif Fazlić obrati, evo obrati se "majstore", ali ubuduće skreni svojim koji ti vode ovo Vijeće da vode računa kako i na koji način će ga voditi. Ovo nije rješenje, ne znaju i svo vrijeme govorim da ne znaju, pa dosta stvari prešutim, pustim, međutim ovaj mandat će se pratiti svaki vaš korak i svaki detalj koji vi radite. Vi to tako želite pa izvolite. Evo obrati se Fazliću, ja te sada molim, da ne budem ja taj neki kočničar, obrati se i reci

nam što nam želiš reći, ali budi korektan pa nam reci da li je ovo poslovnički ispravno.

ALMA OMEROVIĆ - predsjedavajuća

Kolega, ja vodim sjednicu i načelnik će se obratiti na kraju i zamolit ću vas da ne dobacujete da ne bi stvarali ružnu atmosferu, jer mislim da je najkorektnije da vi kao kolega sa iskustvom trebate biti primjer svim kolegama kako svi trebamo biti korektni jedni prema drugima.

ALMIR ŠPIODIĆ - vijećnik NIP-a

Ja sam neko ko brzo zaboravlja i molim vas predsjedavajuća kad mi date riječ pustite me da govorim, pa onda recite što imate. Nismo mi protiv da se načelnik obrati i ovo što kolega Šerak govori mi samo želimo da se poštuju procedure i propisi, akti Općinskog vijeća. Nemamo ništa protiv gospodina Akifa Fazlića da se on nama obrati. Na ovaj način ukazujemo na propuste koje vi konstantno ponavljate iz prethodnog saziva. Ovdje je trebalo da stoji "Informacija o obraćanju načelnika"

ALMA OMEROVIĆ - predsjedavajuća

Kolega Alane nemojte dobacivati, jer kolega Špiodić ima riječ i dajte da se ponašamo normalno u ovoj sali.

ALMIR ŠPIODIĆ - vijećnik NIP-a

Greške se mogu dešavati, ali isto tako greške se mogu priznati. Očekujem od vas da kažete evo napravili smo poslovničku grešku, dozvoljavamo načelniku da se obrati i to je sve.

ALMA OMEROVIĆ - predsjedavajuća

Zaključujem raspravu i evo mislim da nigdje ne piše da se načelnik ne može obratiti, te pozivam načelnika da se obrati.

AKIF FAZLIĆ - općinski načelnik

Želim reći da niko od vijećnika, a ni moji sa druge strane, ne može određivati hoću li se ja obratiti ili se neću obratiti. Dakle, to određuje Poslovnik, to određuju naši akti i na bazi toga treba da se svi ponašamo. Ja nisam ulazio u status ove Informacije u smislu da se ona razlikuje od bilo kojih drugih informacija. Možda da se razlikuje, pa priznat ću i tu vrstu možda pogrešne interpretacije, ali ona je Informacija kao i svaka druga Informacija i po svakoj drugoj Informaciji načelnik se može obratiti, pa i prema ovoj. I s tog aspekta evo ja ću se i obratiti, a ne zato što se neko od vijećnika eto smilovao pa da se ja obratim. Nemojte ljudi da to radimo. Na početku smo mandata i dajte da uspostavimo korektne odnose, naravno odnose zasnovane na aktima kako radi Vijeće i da svojim diskusijama doprinosimo jednom zaista efikasnom radu ovog Vijeća. Dakle, sjednica osim onoga što ima težinu konstituirajuće sjednice, ona je i dijelom protokolarna i dijelom svečana i u tom smislu ja sam imao potrebu da još jedanput čestitam svim izabranim vijećnicima. Čestitao sam to i do sada na druge načine, ali evo zvanična je sjednica i imam potrebu da vam uputim čestitke, da zaželim uspješan rad u ovom mandatu, mandatu u kojem ćemo

imati itekako puno posla i aktivnosti i da vas pozovem na taj posao, na konstruktivnu saradnju da uradimo što više uspješnih stvari koje su bitne za građane naše općine. Dakle, u tom smislu jeste moje obraćanje i još jedanput čestitke i puno uspjeha i sreće u ovom mandatu.

ALMA OMEROVIĆ - predsjedavajuća

Iscrpili smo diskusije po pitanju prve tačke dnevnog reda i primili smo k znanju

Informaciju o potvrđivanju rezultata na Lokalnim izborima 2020. godine za Općinsko vijeće i općinskog načelnika Općine Ilijaš

AD-2

Svečane izjave novoizabranih vijećnika

Vijećnici su dali svečane izjave.

AD-3

a) Prijedlog Odluke o obrazovanju Komisije za izbor i imenovanja

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o obrazovanju Komisije za izbor i imenovanja.

b) Prijedlog Rješenja o izboru članova Komisije za izbor i imenovanja

ALMIR ŠPIODIĆ - vijećnik NIP-a

Nakon otvaranja ove sjednice ovako, mislim da bi se trebali pridržavati ovoga što je načelnik govorio u svom obraćanju tj. da uspostavimo korektne odnose i konstruktivnu saradnju po pitanju daljeg toka sjednica Vijeća. Iz tog razloga predlažem da Rješenje oblikujemo na način da u Komisiji za izbor i imenovanja budu dva člana ispred SDA i po jedan član iz ostalih stranaka koje su parlamentarne u OV-u.

ALMA OMEROVIĆ - predsjedavajuća

Kolega Almire, dostavite nam zvanične prijedloge članova Komisije, tj. imena.

ALMIR ŠPIODIĆ - vijećnik NIP-a

Naravno da ćemo dostaviti. Tražit ćemo pauzu od pet minuta, ako se usvoji ovakav prijedlog.

ELMA MASNOPITA - vijećnica SDA

U skladu sa utvrđenim redom, na osnovu Poslovnika o radu OV-a, KV SDA predleže Komisiju za izbor i imenovanja u slijedećem sastavu:

1. Mehmed Sinanović-predsjednik,
2. Muhamed Handžić-zamjenik predsjednika,
3. Denis Dilberović-član,

4. Halid Dizdarević-član i

5. Adnan Abadžija-član.

ALAN ŠERAK - vijećnik SDP-a

Kao prvo, ne znam odakle nekom pravo da predlaže neko ime iz drugog kluba. To je nonsens političkoj partiji. Valjda se neko taj treba pitati da li želi da bude član te Komisije. To je osnovna elementarna stvar. Slušajući ove vaše prijedloge, SDA treba da ima tri člana, SBB jedan i NIP jedan. Mislim da ste pogrešnim putem stvarno krenuli. Trebali ste implementirati izborne rezultate koje smo ovdje maloprije čuli. SDA kao najveći klub bi trebao da ima dva člana, NIP morao bi da ima minimalno jedan, SBB jedan i SDP jedan član i na taj način da svi budemo zastupljeni u radu ove Komisije. Bojim se da ovo što vi radite "silovanjem" procedura i na nekakve "mišiće" da to u konačnici neće ništa dobro iznjedriti, jer još više stvarate tu polarizaciju unutar Vijeća, a želite da zajednički radimo i da zajednički doprinosimo ovoj lokalnoj zajednici. Mi smo se u proteklom periodu dokazali kako se to radi. Bili smo dobronamjerni, nismo se previše bavili politikom i opšti interes nam je bio u vrhu prioriteta. To je rezultiramo tim, a tu Akif Fazlić koji može da potvrdi da smo u 2019. godini itekako imali određene benefite. Ako želite da to provedete na ovaj način, čestitam, uradite to, ali onda stvarate negativne odnose unutar samog Vijeća koje neće biti za poželjeti u narednom periodu. Naravno vi hoćete na "mišiće, idite na "mišiće", samo vjerujte da i druga strana ima itekako jake "mišiće". Izglasajte ovu Komisiju, nije nikakav problem, ali SDP neće da učestvuje u radu ove Komisije, a kasnije ćete vidjeti i zašto.

ALMIR ŠPIODIĆ - vijećnik SDP-a (replika)

S razlogom kolega Šerak diskutuje i ima pravo da iznese svoje mišljenje obzirom da je i iskusan vijećnik i mislim da je njegov prijedlog prekorektan. Znači, da predložimo koliko članova iz koje stranke mogu biti članovi ove Komisije, pa ćemo onda dati prijedloge-imena na pauzi od pet minuta. Mislim da je nekorektan prijedlog koji je iznijela kolegica Elma Masnopita, subjektivan i ličan, a onda se pitate zašto mi ovako reagujemo. Vi nama ne dozvoljavate saradnju na pravi način. Vi želite da ignorišete sve nas zato što ne pripadamo istoj političkoj opciji.

ALMA OMEROVIĆ - vijećnica SDA

Kolega Špiodiću zamolit ću Vas da se držite tačke dnevnog reda. Ovdje je u pitanju prijedlog članova Komisije za izbor i imenovanja. Molim Vas pričajte o tome, a ne da obrazlažete lični subjektivni stav. Znači, pričajte o vašim prijedlozima. Replicirali ste kolegi i nemojte o subjektivnim stavovima. Tražili ste pauzu i dobit ćete je. Sačinite prijedlog i dostavite da idemo na glasanje.

Sada izvolite nastavite.

ALMIR ŠPIODIĆ - vijećnik NIP-a

Šta da nastavim?

ALMA OMEROVIĆ - vijećnica SDA

Držite se dnevnog reda. Replicirali ste kolegi Alanu Šeraku i pričajte prijedlog članova

Komisije.

ALMIR ŠPIODIĆ - vijećnik NIP-a

Ne govorim kineski jezik. Da li vi mene uopšte razumijete. Ja upravo pričam o prijedlozima članova Komisije za izbor i imenovanja.

ALMA OMEROVIĆ - vijećnica SDA

Da li imate prijedloge?

ALMIR ŠPIODIĆ - vijećnik NIP-a

Naravno da imamo prijedloge, ali moramo ustanoviti s kojim pravom neko može predlagati članove komisije u ime KV NIP-a. S kojim pravo neko ne može da daje prijedloge.

ALMA OMEROVIĆ - vijećnica SDA

Završite diskusiju, pa da nastavimo.

ALMIR ŠPIODIĆ - vijećnik NIP-a

Je li diskusija ili replika?

ALMA OMEROVIĆ - vijećnica SDA

Vaša replika i valjda bi vi trebali znati šta vam je.

MEHMED SINANOVIĆ - vijećnik SDA

Govorimo o izboru članova Komisije za izbor i imenovanja. U pravilu parlamentarna većina obrazuje te komisije. Mi smo imali jedan međustranački sastanak na kojem se nismo uspjeli dogovoriti o broju i raspodjeli članova Komisije za izbor i imenovanja, te na bazi tih razgovora smo predložili Adnana Abadžiju kao jednog člana iz druge političke partije pored SDA i SBB, a na bazi izbornog rezultata koji je osvojila njegova stranka.

ADNAN ABADŽIJA - vijećnik NIP-a

Prije svega, ne bih da komentarišem ništa osim tačke broj 1. koju smo završili i u kojoj smo imali informaciju o broju mandata u Vijeću koje imamo danas. Po računici, ne znam da li se vi znate "igrati" matematike, ali sigurno znate izračunati, od pet članova Komisije gdje bi iz SDA, ovo što je kolega iz SDP-a rekao, bilo dva člana, vjerovatno predsjednik i zamjenik predsjednika i ne znam zašto vam to toliko bitna ova Komisija da budu tri člana iz SDA. Ako imamo mali broj stranaka koje su tu u Vijeću, a ima nas četiri stranke, najviše mandata je osvojila SDA sa 12 mandata, te stoga predlažem da u Komisiji budu dva člana iz SDA, jedan iz NIP-a, jedan iz SDP-a i jedan iz SBB-a. Mislim da bi ovo bilo korektno i fer, pa onda kada sve što bi bilo dobro za građane, mislim da bi ti ljudi u nekom dobrom dogovoru mogli da koordinišu, a ne da dobijamo neke upute prije sjednice Vijeća ili nekada možda prije na mjesec dana.

MUHAMED HANDŽIĆ - vijećnik SBB-a

Ja ću pokušati da približim ovu tačku dnevnog reda kolegama i kolegicama. Vodite vi ovu diskusiju koliko god hoćete, vodićemo koliko god hoćemo naravno i na kraju ćemo svi donijeti prijedloge ispred svojih Klubova. Ti prijedlozi će doći ispred predsjedavajuće i mi ćemo se izjasniti na kraju o njima. Možemo sada ovdje raspravljati tri sata ako vam je to interes naravno i čut ćemo sve diskusije i na kraju ćemo ponovo dostaviti prijedloge. Da li će on biti kao od kolegice Masnopite ili će biti kao od kolege Abadžije ili moj ili Alanov prijedlog, to uopšte nije bitno. Na kraju ćemo se izjasniti glasanjem za te prijedloge. Kakav je bio vaš politički stav na tim dogovorima vi to znate, ja nisam učestvovao na tim dogovorima, nego moj kolega Akif tako da sve ono što je SBB podržao i što je dogovorio biće tako.

ELMA MASNOPITA - vijećnica SDA

Ja bih se samo referisirala oko imena Adnana Abadžije. Ako kolega ne želi da bude predložen u ovu Komisiju, svakako možete dati neko drugo ime koje će biti umjesto kolege Abadžije ili ako niste ni za tu opciju, onda svakako, kao što reče kolega Handžić, nek predlože svoj prijedlog pa ćemo na glasanje.

VERNESA BEŠLIJA - vijećnica NIP-a

Kao što je kolega Sinanović rekao, imali smo međustranački sastanak. Kolegica iz SDP-a i ja smo predložile da, obzirom da da SDA ima najviše mandata, SDA ima dva člana u ovoj Komisiji, a NIP, SDP i SBB po jednog člana. Kažete da ste predložili članove na osnovu izbornog rezultata, pa ako je na osnovu izbornog rezultata zaista ne vidim logiku da SDP-e sa osvojena tri mandata nema člana, a SBB sa osvojena dva mandata ima člana ove Komisije.

ALEMA DŽAFO - vijećnica NIP-a

Nova sam ovdje i ovako kako slušam da jedna stranka dobije tri člana od ukupno pet, dok stranka SDP-a ili NIP-a dobije jednog, a u ovom slučaju SDP niti jednog člana Komisije. NIP je osvojio osam mandata i postoji mogućnost da nema niti jednog člana u Komisiji, pa hajdemo malo logike.

ALAN ŠERAK - vijećnik SDP-a

Slažem se s vama uvažena kolegice, u ovoj općini odavno nema logike, jer ovo su sve neke ne prirodne stvari koje oni žele da rade na neki način na koji su oni navikli. Ja mislim da je ovaj naš prijedlog bio i više nego korektan da zadovoljimo četiri parlamentarne stranke u Komisiji koja broji pet članova. Ako imate neki problem pa da ne vjerujete svom koalicionom partneru nismo vam mi tu krivi. Nemojte da oštetite sada nas i ovu drugu stranu samo zato što se vi pribojavate da će vam tamo neko "proklizati" prilikom glasanja vezano konkretno za tu Komisiju. Ne radi se o tome, niti oni mogu nešto plaho "aman zaman" uraditi. Njihovo je da se drže proceruda i da urade ono što treba da urade. Ostalu odluku će donijeti naravno Općinsko vijeće u skladu sa Ustavom ove države.

ALLEN HASKOVIĆ - vijećnik SDA

Nigdje ni Statutom Općine Ilijaš, niti Poslovnikom o radu OV-a nije definisano na koji način se raspoređuju članovi unutar komisije da to pripada određenim političkim opcijama. Dobra je stvar praviti određenu vrstu raspodjele i imati obzira u tom smislu. Međutim, SDA je izborni pobjednik i mi u svom prijedlogu smatramo da trebamo imati tri člana u ovoj Komisiji. Još smo predložili Muhameda Handžića kao kolegu iz SBB-a našeg koalicionog partnera i Adnana Abadžiju, s tim da smatramo da je Narod i pravda stranka iz opozicije koja ima najviše mandata. Ukoliko se vama ne sviđa da to bude Adnan Abadžija možete eventualno predložiti nekoga drugog i tu nemamo apsolutno nikakvih problema ili nekoga iz SDP-a što nama takođe nije problem ili ako ne želite nikoga u ovoj Komisiji takođe nam ni to ne predstavlja nikakav problem. Mi smo dostavili svoj prijedlog i smatramo da trebamo imati tri člana u ovoj Komisiji, jedan član SBB i jedan član da kažemo "čtvorka" koja je zajedno nastupila na ovim izborima i dogovorite se oko tog člana ukoliko ga želite u ovoj Komisiji. Dostavite svoje prijedloge, glasat ćemo o njima i donijeti konačnu odluku. Ja ne bih da sada idemo do besvjesti u neku vrstu rasprave.

ALMIR ŠPIODIĆ - vijećnik NIP-a

Poštovani dopredsjedavajući ja razumijem da ste vi na funkciji sada trenutno, ali ne smijete sebi dati za pravo da vi određujete koji Klub će koga predložiti u Komisiju za izbor i imenovanje. Jasno je da u Poslovniku o radu OV-a nije jasno definisano da trebaju biti članovi Komisije iz svih stranaka. Ja vođen onim što je načelnik rekao maloprije, a i sa onim što je rekao u intervjuu za Novu Godinu gdje je najavio da ima većinu i da želi fer i korektnu saradnju, ako želimo fer i korektnu saradnju, mi sa ovom porukom koju ste nam poslali, jasno smo je pročitali i vidimo da vi ne želite korektnu saradnju. Nemojte da se onda ljutite i da nas gledate tako "preko oka" kada mi repliciramo i tražimo da radimo po Statutu. KV NIP-a neće prihvatiti niti jednog člana u Komisiji po ovom prijedlogu gospođice Elme ako se ne bude našao prostor da u Komisiji bude neko iz SDP-a. Još jedna stvar, mi nismo Koalicija SDP i Narod i pravda. Mi smo bili Četvorka koalicija na izborima za načelnika općine Ilijaš. Mi kao Klubovi vijećnika nismo u koaliciji i nemojte nas odmah svrstavati u neki koš koji vama odgovara. Dakle, moraćemo da poštujemo malo više jedni druge i mislim da je respektabilan omjer ako ćete da se dijelimo na poziciju i opoziciju i sa nas 11 je respektabilan i broj glasova i broj mandata koji imamo u Općinskom vijeću. Zbog bolje saradnje, zbog harmonizacije u Općinskom vijeću predlažem, kada se iscrpi diskusija, pauzu da dostavimo prijedloge i da budemo korektni onako kako vi nas pozivate kad vama treba da budemo korektni. Ako nastavite da radite u ovom pravcu kako ste počeli, mislim da ćemo u narednom periodu zaista se susresti sa mnogo problema i siguran sam da ćemo opravdati ove dnevnice od 50,00 KM koliko imamo, tako da ćemo raditi možda i preko osam sati na sjednicama Općinskog vijeća.

ALAN ŠERAHA - vijećnik SDP-a (replika)

Uvaženi kolega Haskoviću, previše ti nešto ovdje "moralíšeš", jer nisi ti ta moralna vertikala koja bi nama trebala držati neku vrstu pridika, a pogotovo zbog svega što si radio u prošlosti mijenjanjem raznoraznih stranaka gledajući svoj interes u toj svoj priči, ali o tome neću. Ja ću u ime KV SDP-a zatražiti pauzu od petnaest minuta radi konsultacija unutar svog Kluba.

ALMA OMEROVIĆ - predsjedavajuća

Prije nego što odemo na pauzu, zamoliti ću kolegu Almira Špiodića da na pauzi pripremi prijedlog članova Komisije za izbor i imenovanja i prije toga bih samo upitala kolegu Admira Abadžiju ili KV Naroda i pravde

ALMIR ŠPIODIĆ - vijećnik NIP-a (krivi navod)

Nisam rekao da ću predložiti ja svoj prijedlog, nego KV NIP-a.

ALMA OMEROVIĆ - predsjedavajuća

Pitam vas hoćete li predložiti? Ako hoćete, da na pauzi pripremite i upravo sam i rekla samo da se sluša i kolega malo poštovanja. Znači KV Naroda i pravde ukoliko želi da pripremi prijedlog neka to učine na pauzi i zamolit ću kolegu Adnana Abadžiju, čisto i radi našeg iskorištavanja pauze da znamo da li će ostati kandidat za člana Komisije. Molim vas nemojte dobacivati, pauza ide samo da završim.

ADNAN ABADŽIJA - vijećnik NIP-a (replika)

Replika je po pitanju Admira Abadžije i morat ćete do Podlugova otići da bi sa njim malo razgovarali, a ja sam Adnan Abadžija i nemojte me više miješati sa drugim osobama.

ALMA OMEROVIĆ - predsjedavajuća

Oprostite, ja se lično izvinjavam - Adnan Abadžija.

ADNAN ABADŽIJA - vijećnik NIP-a (replika)

Što se tiče KV NIP-a, mi ćemo se u toku pauze dogovoriti i dostaviti prijedloge za članove Komisije nakon pauze.

ALMA OMEROVIĆ - predsjedavajuća

Pauza petnaest minuta, pa nastavljamo (10:55-11:15h)

ALMA OMEROVIĆ - predsjedavajuća

Tačka dnevnog reda je b) Prijedlog Rješenja o izboru članova Komisije za izbor i imenovanja.

Nakon pauze kolege su dostavile prijedloge.

Kolega Adnane Abadžija i kolega Alane Šerak, neformalno sam čula, da li su ovo prijedlozi u ime oba Kluba?

ALAN ŠERAK - vijećnik SDP-a

Odgovor je da.

ALMA OMEROVIĆ - predsjedavajuća

Imamo dva prijedloga, odnosno dvije liste za članove Komisije za izbor i imenovanja.

Prijedlog broj 1. kojeg je kolegica Elma iznijela je:

1. Mehmed Sinanović - predsjednik
2. Muhamed Handžić - zamjenik predsjednika,
3. Denis Dilberović - član ,
4. Halid Dizdarević - član i
5. Adnan Abadžija - član.

Kolega Adnane da li prihvatate kandidatu, obzirom da se ostale kolege prihvatile ili želite kao predsjednik KV NIP-a da predložite nekog drugog za ovaj prijedlog?

Ja ću kasnije pročitati vaš prijedlog.

ADNAN ABADŽIJA - vijećnik NIP-a

Mi smo za naš prijedlog i za taj prvi nećemo ni glasati.

ALMA OMEROVIĆ - predsjedavajuća

Znači Vi odustajete od prijedloga broj 1. da se nađete kao član na ovoj listi.

ADNAN ABADŽIJA - vijećnik NIP-a

Nećemo uopšte glasati za taj prijedlog.

ALMA OMEROVIĆ - predsjedavajuća

Uredu, zahvaljujem. Obzirom da ste vi u vašim diskusijama kazali, bez obzira što ste kao Klubovi dostavili zajedno prijedloge, da niste koalicija, Klubovi su odvojeni, evo ja ću u ime KV SDA pitati da li kolega Alan Šerak, kao predsjednik Kluba SDP-a, ima neki drugi prijedlog ukoliko želite da upotpunite petog člana Komisije za izbor i imenovanja?

ALAN ŠERAK - vijećnik SDP-a

Nemam drugi prijedlog. Stvari su kristalno jasne. Mi želimo da u toj Komisiji budemo zastupljeni svi i zato smo dali prijedlog ispred NIP-a i ispred SDP-a. Ukoliko u Komisiji ne budu članovi i iz NIP-a i SDP-a, onda mi nismo za Komisiju koju ćete vi nama predložiti.

ALMA OMEROVIĆ - predsjedavajuća

Ponovit ću još jednom prijedlog broj 1.

1. Mehmed Sinanović - predsjednik
2. Muhamed Handžić - zamjenik predsjednika,
3. Denis Dilberović - član ,
4. Halid Dizdarević - član i
5. Semir Dedić - član.

Prijedlog broj 2. za članove Komisije za izbor i imenovanja koji su predložili Klubovi vijećnika NIP-a i SDP-a zajedno:

1. Mehmed Sinanović - predsjednik
2. Muhamed Handžić - zamjenik predsjednika,
3. Halid Dizdarević - član,
4. Adnan Abadžija - član i
5. Alan Šerak - član.

Dajem na glasanje Prijedlog broj 1. koji je kandidovao KV SDA i SBB.

Općinsko vijeće je sa 13 glasova ZA i 11 PROTIV glasalo za prijedlog broj 1. koji je kandidovao KV SDA i SBB.

Zatim je predsjedavajuća dala na glasanje Prijedlog broj 2. koji su predložili Klubovi vijećnika NIP-a i SDP-a zajedno.

Općinsko vijeće je sa 11 glasova ZA i 13 protiv glasalo za Prijedlog broj 2. koji su predložili Klubovi vijećnika NIP-a i SDP-a zajedno.

Konstatovano je da je Općinsko vijeće Ilijaš sa 13 glasova ZA i 11 glasova PROTIV donijelo

Rješenja o izboru članova Komisije za izbor i imenovanja

u slijedećem sastavu:

1. Mehmed Sinanović - predsjednik
2. Muhamed Handžić - zamjenik predsjednika,
3. Denis Dilberović - član,
4. Halid Dizdarević - član i
5. Semir Dedić.

ALMA OMEROVIĆ - predsjedavajuća

Zahvaljujem, zatvaram tačku dnevnog reda i prelazimo na tačku c) Izbor Komisije za provođenje izbora za predsjedavajućeg i zamjenika predsjedavajućeg Općinskog vijeća Ilijaš.

ALAN ŠERAK - vijećnik SDP-a (poslovnička intervencija)

Javljam se za riječ, a ti zatvaraš tačku dnevnog reda.

ALMA OMEROVIĆ - predsjedavajuća

Zato što smo iscrpili raspravu po pitanju ovog i zatvorili smo glasanje. Ja sam predsjedavajuća i vodim sjednicu. Rekli ste poslovnička intervencija i izvolite.

ALAN ŠERAK - vijećnik SDP-a (poslovnička intervencija)

Poslovnička intervencija se odnosi na slijedeće, i zapiši sebi da ubuduće ne praviš te greške, tačka 3. pod a) Prijedlog Odluke o obrazovanju Komisije za izbor i imenovanja. Jesmo li mi glasali da se ta Komisija obrazuje?

ALMA OMEROVIĆ - predsjedavajuća

Kolega, naravno da smo glasali kada je bilo na dnevnom redu.

ALAN ŠERAK - vijećnik SDP-a (poslovnička intervencija)

Kada?

ALMA OMEROVIĆ - predsjedavajuća

Kolega nemojte molim vas tako. Uzmite stenogram i poslušajte i sve što imate onda se žalite.

Tačka 3. glasamo pod c), odnosno tačka 3. pod c).

ALAN ŠERAK - vijećnik SDP-a (poslovnička intervencija)

Recite mi kada se glasalo?

ALMA OMEROVIĆ - predsjedavajuća

Kolega, naravno da ste glasali za Odluku o obrazovanju Komisije za izbor i imenovanja.

ALEN HASKOVIĆ - zamjenik predsjedavajućeg

Kolega Alane, kolegica Omerović je Odluku stavila pred sebe i kazala imate je u materijalu i pitala ima li potrebe da je pročita i niko se nije javio, otvorila raspravu, zatvorila rasprava i potom je dala na glasanje Odluku o obrazovanju Komisije za izbor i imenovanja.

ALMA OMEROVIĆ - predsjedavajuća

Potom smo prešli na tačku b), imali raspravu, napravili pauzu, vratili se i predložili prijedloge. Molim vas stvarno da pratimo.

Prelazimo na tačku c) Izbor Komisije za provođenje izbora za predsjedavajućeg i zamjenika predsjedavajućeg Općinskog vijeća Ilijaš

ALEN HASKOVIĆ - zamjenik predsjedavajućeg

Na osnovu člana 47. Statuta Općine Ilijaš i Poslovnika o radu Općinskog vijeća Ilijaš KV SDA Ilijaš predlaže kandidatkinju Almu Omerović za predsjedavajuću Općinskog vijeća Ilijaš.

ALMA OMEROVIĆ - predsjedavajuća

Kolega Alene Haskoviću, u pitanju je Izbor Komisije za provođenje izbora za predsjedavajućeg i zamjenika predsjedavajućeg Općinskog vijeća Ilijaš

ALEN HASKOVIĆ - zamjenik predsjedavajućeg

Izvinjavam se.

ALMA OMEROVIĆ - predsjedavajuća

Ova Komisija treba imati tri člana i ne znam da li ste na pauzi o tome razgovarali. Evo ja predlažem da jedan od članova bude Alen Hasković. Pozivam kolege vijećnike da predlože ostala dva člana, ko želi.

ADNAN ABADŽIJA - vijećnik NIP-a

Ispred NIP-a predlažem Almira Špiodića.

ALMA OMEROVIĆ - predsjedavajuća

Još jedan član. Da li želi neko od kolega ispred SDP-a?

Ako ne želi, predlažemo Kenana Hasića.

Dakle, prijedlozi za Komisiju za provođenje izbora za predsjedavajućeg i zamjenika predsjedavajućeg Općinskog vijeća Ilijaš su:

1. Alen Hasković - predsjednik
2. Almir Špiodić - član i
3. Kenan Hasić - član.

Općinsko vijeće je većinom glasova izabralo Komisiju za provođenje izbora za predsjedavajućeg i zamjenika predsjedavajućeg Općinskog vijeća Ilijaš u slijedećem sastavu:

1. Alen Hasković - predsjednik
2. Almir Špiodić - član i
3. Kenan Hasić - član.

AD-4

Izbor:

a) predsjedavajućeg Općinskog vijeća Ilijaš

ALEN HASKOVIĆ - zamjenik predsjedavajućeg

Na osnovu člana 47. Statuta Općine Ilijaš i Poslovnika o radu Općinskog vijeća Ilijaš KV SDA Ilijaš predlaže kandidatkinju Almu Omerović za predsjedavajuću Općinskog vijeća Ilijaš.

ALAN ŠERAK - vijećnik SDP-a

KV SDP-a je dostavio svoj prijedlog sekretaru OV-a na bazi člana 47. Statuta Općine Ilijaš i naš prijedlog je uvažena gospođa Selma Barić.

ALMA OMEROVIĆ - predsjedavajuća

Dakle, za predsjedavajuću Općinskog vijeća Ilijaš KV SDA predlaže Almu Omerović,

a KV SDP-a predlaže Selmu Barić.

Da li se slažete da spojimo ove dvije tačke dnevnog reda, odnosno definisano je da odvojeno dešava ovaj proces tj. da donesemo Zaključak da izborni proces spojimo, a naravno da će materijali biti odvojeni za izbor predsjedavajućeg i zamjenika predsjedavajućeg. Znači, 25 listića za izbor predsjedavajućeg i 25 listića za izbor zamjenika predsjedavajućeg ili ukoliko želite da pravimo dva izborna procesa, nije nikakav problem. Kako god želite?

ADNAN ABADŽIJA - vijećnik NIP-a

Predlažem da dva puta obavimo glasanje.

ALMA OMEROVIĆ - predsjedavajuća

Obzirom da imamo obrazovane komisije koje su nam potrebne tj. Komisiju za izbor i imenovanja i Komisija za provođenje izbora za predsjedavajućeg i zamjenika predsjedavajućeg Općinskog vijeća Ilijaš zamolit ću Komisije da pristupe svom poslu, da pripreme glasački materijal.

ALMIR ŠPIODIĆ - vijećnik NIP-a

Mislim da bi se mi, kao Komisija, trebali upoznati sa biografijama kandidata i izjavama o nacionalnosti vezano za ove prijedloge. Hoćemo li to ovdje ili na sastanku Komisije za provođenje izbora za predsjedavajućeg vijeća?

ALMA OMEROVIĆ - predsjedavajuća

Kolega, kardinalna je greška pitati nekoga za nacionalno izjašnjavanje zato što je to zakonski zabranjen lični podatak. Vi ukoliko imate sumnji, kada prođu ovi prijedlozi, kandidati, podnosite apelaciju Ustavnom sudu i oni će vam odgovoriti. Ali, zaista bilo koga to pitati, ja lično to sebi ne bih dozvolila, jer to apsolutno nije dozvoljeno pitati nekoga javno za nacionalno izjašnjavanje. Sve nedoumice uputite prema Ustavnom sudu i dobit ćete odgovor i one Odluke koje donesemo ukoliko budu neustavne isto tako ćemo imati odgovor.

ALAN ŠERAK - vijećnik SDP-a (replika)

Moramo znati određene procese. Trenutno smo u fazi konstituisanja Vijeća u gradu Sarajevu. Procedura koja ide gore kako bi se moglo konstituisati Gradsko vijeće ima određene svoje propise. Svako od tih Vijeća dobije nacionalnu strukturu vijeća i to nije nikakav tajni podatak. Dakle, to ko vam je rekao, taj vas je dezavuisao. Samo želim da skrenem pažnju Komisiji za izbor i imenovanja koja u konačnici treba da napravi konačan prijedlog, a ova druga Komisija treba samo da provede izbore iako mi je i ovo malo "škakljivo", jer inače je Komisija za izbor i imenovanja je birala ovu Komisiju koja će provesti proceduru izbora, a ne mi kao Vijeće, ali nema veze. Dakle, to nije nikakva tajna.

ALMA OMEROVIĆ - predsjedavajuća (ispravka krivog navoda)

Sada ste rekli da nije Vijeće biralo, ali naravno da smo sada izjašnjavali o ovim članovima Komisije. Naravno da je Vijeće glasalo.

ALAN ŠERAK - vijećnik SDP-a

Nisi čula šta sam rekao, ali nema veze.

ALMA OMEROVIĆ - predsjedavajuća

Čula sam ja šta ste vi rekli, ali izvolite.

ALAN ŠERAK - vijećnik SDP-a

Način biranja predsjedavajućeg i zamjenika predsjedavajućeg po raznim skupštinama i raznim nivoima u ovoj državi se radi na način kako je to Ustavom propisano. Nacionalna struktura Vijeća nije nikakav tajni dokument. To CIK BiH na zahtjev Općinskog vijeća dostavlja vijećnicima i ne može se sada desiti da mene neko kao vijećnika dezavuiše i traži od mene da glasam za nešto, a maloprije ja položio zakletvu da ću štiti Ustav ove države i njen ustavni poredak. Bogami je to krupna stvar. Ne ulazim ja ko se izjasnio i svako ima pravo da kaže kako se nacionalno osjećao, svoj identitet. To je njegova lična stvar. Na bazi tog i izjašnjavanja određeni ljudi konzumiraju određena prava, pa tako ste imali situaciju u Skupštini Kantona Sarajevo, samo da vam jedan klasičan primjer pokažem. Kada je trebalo da bude neko izabran za podpredsjednika.

ALMA OMEROVIĆ - predsjedavajuća

Kolega molim vas da se držimo tačke dnevnog reda i nemojte nam navoditi primjere kako je tamo gore u nekim skupštinama. Znači, molim vas da pričamo o izboru predsjedavajućeg Općinskog vijeća Ilijaš.

ALAN ŠERAK - vijećnik SDP-a

Pričam o proceduri gospođo draga. Ne razumiješ neke stvari, pa hoću da ti pojasnim, da naučiš, trebat će ti u budućnosti.

ALMA OMEROVIĆ - predsjedavajuća

Imate još minut i pol.

ALAN ŠERAK - vijećnik SDP-a

Hvala. Dakle, iz reda srpskog naroda se trebao birati zamjenik predsjedavajućeg, pa se birao između Igora Stojanovića i Smiljane Viteškić. To nije mogao biti ni Dino Konaković, ni Segmendina Srna, niti niko peti deseti. To je bilo usko vezano za ljude koji su se tako izjasnili. To i mi isto ovdje treba da uradimo. Da biramo nekog ko se izjasnio drugačijom nacionalnosti u odnosu kako se izjasnio uvaženi načelnik Akif Fazlić. I to je suština. I ne može se desiti da nas neko dezavuiše. Nama se to treba predočiti, pa da se izjasnimo.

ALMIR ŠPIODIĆ - vijećnik NIP-a (replika)

Poštovana predsjedavajuća, kada neko traži repliku daje se replika, pa tek onda diskusija.

ALMA OMEROVIĆ - predsjedavajuća (ispravka krivog navoda)

Kolega Alan Šerak je tražio repliku na ono što sam ja rekla, pa ste vi tražili drugi, pa sam vam ja dala i mogla bih ja vas malo učiti procedurama zato što ne slušate. Svo vrijeme ste na sjednici, ali ne slušate.

Uzmite stenogram i vidjet ćete šta je kolega tražio.

Molim vas da se uključite i da pratite.

ALMIR ŠPIODIĆ - vijećnik NIP-a (replika)

Ako je Alan tražio repliku, evo izvinjavam se, pogriješio sam, u pravu ste. Ja ne želim da učestvujem u nečemu gdje ću kršiti ono u što sam se zakleo prije sat i po na ovoj sjednici i kažete da je to meni neka greška. Mislim da je to gruba riječ da kažete nekom vijećniku da li je to nečija greška ili nije. Mislim da bi vi kao predsjedavajuća trebali koristiti stručne termine kada se nekome od vijećnika obraćate. To je jedno. Drugo, ja se ovdje držim Ustava Kantona Sarajevo s obzirom da Poslovnikom, a i Statutom Općine Ilijaš nije precizno definisan izbor i imenovanje predsjedavajućeg općinskog vijeća. Član 37. Ustava Kantona Sarajevo jasno govori ko se bira i na koji način se može birati predsjedavajući općinskog vijeća vezano ako je načelnik iz reda jednog naroda, a predsjedavajući ili dopredsjedavajući moraju biti iz reda drugih konstitutivnih naroda tj. ako po popisu stanovništva ima preko 80% upisanih stanovnika drugog naroda. Molim vas, kada radimo ove tačke dnevnog reda, mislim da bi korektno bilo da sekretar vijeća ima Ustav Kantona Sarajevo čisto da me informiše i da se ja ne bih ogriješio o zakone.

ALAN ŠERAK - vijećnik SDP-a (replika)

Replika je da se pojasne određene stvari da ništa ne bi bilo nedorečeno. Kolega Špiodić je naravno upravu za ovo sve što je rekao, ali ja ću ipak tražiti da bude i zvanično od sekretara OV-a da nam pročita član 47. Statuta Općine Ilijaš čisto da vijećnici svojim ušima čuju šta je ispravna procedura.

ILDA KAHRIMAN - sekretar Općinskog vijeća Ilijaš

Član 47. Statuta Općine Ilijaš glasi:

"Općinsko vijeće tajnim glasanjem vrši izbor predsjedavajućeg i zamjenika predsjedavajućeg iz reda izabranih vijećnika, vodeći računa da predsjedavajući i općinski načelnik nisu iz istog konstitutivnog naroda ili rada ostalih, ako je Općinsko vijeće višenacionalnog sastava.

Kandidate za izbor predsjedavajućeg i zamjenika predsjedavajućeg mogu predložiti, svaki vijećnik ili grupa vijećnika.

U svrhu izbora predsjedavajućeg i zamjenika predsjedavajućeg mogu se obavljati konsultacije između predstavnika političkih subjekata koji imaju svoje članove u Općinskom vijeću.

Komisija za izbor i imenovanja podnosi izvještaj sa prijedlogom kandidata za izbor predsjedavajućeg i njegovog zamjenika, a u vezi sa stavom 2. i 3. ovog člana".

ALMA OMEROVIĆ - predsjedavajuća

Kada pitam da li se još neko javlja za riječ i dam riječ nekome ko se javio, molim vas praktikujte da repliku odmah zatražite da ne bi bilo kršenje Poslovnika s moje strane.

Znači, to uradite na vrijeme, nemojte čekati da nekom drugom dam riječ, pa tražite repliku i onda ja moram ovako prekidati.

ALMIR ŠPIODIĆ - vijećnik NIP-a (replika)

Opet je do mene predsjedavajuća. Ja sam dizao ruku, a vi ste gledali u kolegu Haskovića.

ALMA OMEROVIĆ - predsjedavajuća

Pogledala sam i nisam primjetila.

ALMIR ŠPIODIĆ - vijećnik NIP-a (replika)

Do mene je i drugi put ću dići ruku visočije. Molio bih sekretara OV-a da nam pročita član 37. Ustava Kantona Sarajevo.

ILDA KAHRIMAN - sekretar Općinskog vijeća Ilijaš

Član 37. Ustava Kantona Sarajevo glasi:

"Struktura vlasti u općinama

Zakonodavnu vlast u općinama vrše općinska vijeća, koja se, ovisno od broja stanovnika, sastoje od 9 (devet) do 35 (tridesetpet) članova. Članovi općinskih vijeća se biraju na neposrednim izborima tajnim glasanjem na području cijele općine. Izbori članova općinskih vijeća organiziraju se u pravilu istovremeno sa izborima za Skupštinu.

Izvršnu vlast u općini vrši općinski načelnik kojega bira općinsko vijeće na prijedlog članova.

Sudsku vlast u općinama vrše općinski sudovi. Ove sudove osniva i finansira Skupština Kantona, s tim da se sud može osnovati za više općina. Sudije općinskih sudova imenuje predsjednik najvišeg kantonalnog suda uz konsultacije sa općinskim načelnikom.

Amandman XXXVII

Član 37. mijenja se i glasi:

"Član 37.

Općina ima općinsko vijeće i općinskog načelnika.

Mandat članova općinskog vijeća i općinskog načelnika je četiri godine.

Općinske vijećnike i općinskog načelnika biraju, demokratskim putem, birači na neposrednim i tajnim izborima na cijelom području općine, na način utvrđen zakonom.

Općinski načelnik i predsjedavajući općinskog vijeća u općinama ili općinskim vijećima višenacionalnog sastava ne mogu biti iz reda istog konstitutivnog naroda, odnosno iz reda Ostaih, izuzev u onim općinama u kojima jedan konstitutivni narod čini više od 80% stanovnika, prema posljednjem popisu stanovništva u Bosni i Hercegovini.

Konstitutivni narodi i pripadnici Ostalih bit će proporcionalno zastupljeni u općinskim organima vlasti. Takva zastupljenost će odražavati popis stanovništva iz 1991. godine do potpune provedbe Aneksa 7, u skladu sa članom IX.11.a. Ustava Federacije Bosne i Hercegovine".

ALEN HASKOVIĆ - zamjenik predsjedavajućeg

Zaista KV SDA poštuje svačije pravo da se izjasni onako kako želi i eventualno odredi se u smislu pripadnosti određenoj grupi konstitutivnih naroda ili iz reda Ostalih. Mi ostajemo kod našeg prijedloga za predsjedavajućeg i naša kandidatkinja je Alma Omerović. Mi ne znamo, a i ne želimo da vas pitamo o načinu izjašnjenja ili eventualnoj pripadnosti konstitutivnog naroda vašeg kandidata. Predlažem da nastavimo sa ovom procedurom tajnog izbora predsjedavajućeg općinskog vijeća i u konačnici od ishoda same te procedure ukoliko imate nekih sumnji eventualno na izjašnjenje naše kandidatkinje, imate puno pravo da pokrenete bilo kakvu vrstu pitanja ustavnosti naše Odluke.

ALAN ŠERAK - vijećnik SDP-a

Potpisujem ti 80% diskusije, s tim što želim da napomenem sve nas ovdje, ja lično ne želim da me se dezavuiše i dovede u situaciju da glasam za nešto što nije u skladu sa Ustavom. Vi treba da mi otklonite tu sumnju i da mi kažete "jeste u skladu sa Ustavom, nije u skladu sa Ustavom" i ako jeste da pristupimo glasanju, a ako nije onda nećemo ni glasati.

ALEN HASKOVIĆ - zamjenik predsjedavajućeg (replika)

Zaista, ako sumnjate u ustavnost našeg prijedloga, rekao sam vam koja je procedura nakon što provedemo izbore predsjedavajuće. Podsjetit ću vas još i da je taj podatak o tome kako se ko izjasnio. Svaki kandidat prilikom kandidovanja na općinske ili bilo koje druge izbore nije dužan uopšte upisati svoju nacionalnost ili pripadnost određenoj vrsti konstitutivnog naroda i može biti kandidat na izborima. Slažete se?

ALMIR ŠPIODIĆ - vijećnik NIP-a

Ja hoću ponovo da se vratim i čitam kako piše. U Statutu Općine Ilijaš, kolege koji su bili u prošlom sazivu Vijeća znaju, a ovi koji su ušli sada u sastav Vijeća važno je da pročitate član 45. Statuta koji glasi:

"Članovi vijeća odgovaraju za ustavnost i zakonitost akata koje Općinsko vijeće donosi u okviru svojih nadležnosti". Ja ne želim da kršim Ustav, ne želim da kršim Statut. Molim vas, ne znam zašto je toliko problem da kandidati i bilo bi korektno da se kandidati predstave i kažu nešto više o sebi. Možda se mi ne poznajemo dovoljno dobro. Znači da se kandidati predstave i kažu iz kojeg reda naroda dolaze. Ne znam šta je tu problem. Ja se ne stidim reći da sam Bošnjak bilo gdje. Dakle, evo ja se izjašnjavam kao Bošnjak i ne znam šta je tu problem.

MUHAMED HANDŽIĆ - vijećnik SBB-a (replika)

Evo ponovo jedna diskusija za kojom nema apsolutno potrebe, ali evo da pojasnim. Dakle, u prošlom sazivu Vijeća kada je Alma Omerović izabrana za predsjedavajuću, ja sam bio najveći oponent i protivnik tome i evo gledam u lice gospođici i kažem i bio sam na granici za pokretanjem ustavnosti. Međutim, pročitao sam Izborni zakon, pročitao sam Ustav Kantona Sarajevo, našao sam to o čemu kolega Špiodić govori 80%, otišao sam i Izbornu komisiju koja je provodila popis stanovništva 2013. godine i on je 92%, evo Nijaz sjedi preko puta mene, tj. 92% Bošnjačkog stanovništva stanuje na Općini Ilijaš. To odgovorno tvrdim i evo stenogram će biti o ovome ovdje. Prema tome, nema nikakvih

ograničenja i ja ću podržati ovaj prijedlog za izbor predsjedavajuće. Dakle, stojim iza svakog svog postupka, a i za ovo što sada kažem. Nema nikakvih ograničenja da iz jednog naroda, u ovom slučaju Bošnjačkog, bude predsjedavajuća i načelnik općine Ilijaš.

ALAN ŠERAK - vijećnik SDP-a (ispravka krivog navoda)

Drago mi te bilo čuti Handžiću, malo mijenjaš te kurseve, ali nema veze. Ispravka krivog navoda se odnosi na činjenicu da nije istina ovo što si nam sada fino demonstrativno rekao što si rekao. Kada uzmete nešto da čitate i to gdje ste vi nešto kao tražili ili niste tražili ili da jeste tražili tamo bi vam bilo fino rečeno da će se popis iz 1991. godine primjenjivati sve dok se Aneks 7. Dejtonskog mirovnog sporazuma. I to vam piše u Ustavu Federacije BiH i Kantona Sarajevo. Dakle, ovo što ste vi rekli ja razumijem da imate potrebu da malo pomognete, ali nemojte molim vas da krivo navodite i da tvrdite da nešto apsolutno nije tako.

MUHAMED HANDŽIĆ - vijećnik SBB-a (replika)

Evo ja i ti opet na replike i prošli saziv vijeća smo ovako. Dakle, ne mijenjam ja mišljenje kolega Šerak, ne mjenjam sve što ste vi rekli, nego pokušavam da približim ono čime sam se ja bavio u proteklom vijeću i iskustva koja sam provodio. Da sam imao bilo kakvog osnova u prošlom sazivu vijeća da osporim Almi Omerović da ne bude predsjedavajuća, ja bi to uradio. Nisam imao osnova i nije se to desilo.

ALAN ŠERAK - vijećnik SDP-a (replika)

Vidi, možemo se ja i ti ovdje raspravljati večeras do 12:00 sati oko tih stvari na baz argumentacije. Ja ti fino citiram odredbu Ustava Federacije BiH, a onda se ti javiš i repliciraš imeni i tvdiš nešto sasvim drugo. Nisi u pravu prijatelju. Ja bolje poznajem te stvar od tebe, vjeruj mi. Ono što piše u Ustavu, piše u Ustavu i to se ne može mijenjati, jedino da ga Parlament Federacije izmjeni dvotrećinskom većinom i to je procedura, ali ono što piše onda treba autentično i primjenjivati u praksi, a to tamo piše. To što ste vi rekli 80 ili 90%, opet ću vam ponoviti. Piše da se primjenjuje popis iz 1991. godine do provedbe Aneksa 7. Dejtonskog mirovnog sporazuma. Obzirom da nije proveden i dalje se primjenjuje popis iz 1991. godine. Evo tu ću staviti tačku i po tom pitanju se više neću javljati. Ako hoćete našto da mi kažete, onda molim vas na bazi argumentacije.

ALMIR ŠPIODIĆ - vijećnik NIP-a (replika)

Poštovani kolega Handžić je zaista pokušao da nam približi ovu tačku dnevnog reda i razumijem u potpunosti njegovu diskusiju i upotpunosti bi se složio sa njim daje primjenjen popis iz 2013. godine. Nažalost nije, a i ja se radujem primjenjivanju popisa iz 2013. godine i mislim da je i vrijeme da viši organi vlasti to i urade. Međutim, nažalost, opet kažem, mi moramo raditi po onome što nam piše u ovim dokumentima, jer smo položili zakletvu, a to jeste ovo što je i Alan ponavljao da se popis iz 1991. godine primjenjuje sve dok se ne provede Aneks 7. Dejtonskog mirovnog sporazuma.

MUHAMED HANDŽIĆ - vijećnik SBB-a (replika)

Dakle, nije popis iz 1991. godine osnova za izbor, nego zadnji popis i tamo piše prema zadnjem popisu. To je jedno, a drugo, ja čitam kolega Alane, ja ne sumnjam u to da vi ne

znate i da i vi ne čitate. Navest ću vam samo jedan primjer - da li u Bratuncu poštuju taj Aneks 7. ili u Čapljini, pa ne poštuju nigdje. Dakle, to nije osnov o kojem mi trebamo raspravljati. Naime, radi se o zadnjem popisu, a ne popisu iz 1991. godine.

ALAN ŠERAK - vijećnik SDP-a (ispravka krivog navoda)

Prijatelju Handžiću, opet ste krivo navodili, a ja sam vas zamolio drugi put kada se javite za riječ i želite nešto pametno da kažete po tom pitanju, evo sad vas molim citirajte mi taj član zakona, ustava, propisa ili ne znam čega, možda sam ja u nekoj zabludi. Hajde molim vas sad recite mi gdje to piše i pod kojim članom tog dokumenta. Hajde molim vas. Evo možda ja ne znam.

MUHAMED HANDŽIĆ - vijećnik SBB-a (replika)

Pošto ja vidim da se vi bavite tim dokumentima, pa hajte vi meni nađite taj član Ustava na koj se vi opozivate da se izbor vrši na osnovu popisa iz 1991. godine i pročitajte mi ga autentično.

ALMIR ŠPIODIĆ - vijećnik NIP-a (replika)

Poštovani kolega Handžiću ja zaista ne znam, a očigledno je da se Dejtonski mirovni sporazum ne provodi na cijeloj teritoriji Bosne i Hercegovine, to je očito i zaista ne znam kakvo je stanje u Bratuncu i ostalim gradovima entiteta Republike Srpske. Ono što ja želim je jedno, a ono što piše u ovim dokumentima je drugo. Ne bih želio da se ovo protumači da kao ja imam nešto protiv što će biti predsjedavajući Bošnjak, pa ja sam ljudi Bošnjak i želim da budu bošnjaci odavde do Istanbula, ali ne može. Mi se moramo držati onoga što piše u zvaničnim aktima i propisima koje mi poštujemo i po kojima radimo. Znači ja nemam ništa protiv toga da bude Bošnjak predsjedavajući, ali ako piše u Statutu, a taj Statut i Ustav je neko usvojio i donio član 37. kojeg je čitala i citirala sekretar Općinskog vijeća i koji nam je jasno rekao da se koristi popis iz 1991. godine. Ako ima neka Uredba ili nešto, dajte, i ja bih volio da nisam u pravu ovo sve što govorim. Ako imate ovo što je kolega Alan Šeraka govorio, bilo kakav zvanični dokument, član zakona, uredbu ili nešto da piše, pročitajte nam. Nemojte nas dovoditi u zabludu i nemojte nas navoditi da činimo nešto i da "sutra" moramo odgovarati za ustavnost odluka koje donosimo. Evo ja ću podržati sve to što vi govorite, samo mi kažite u kojem ustavu, odredbi ili bilo čemu to piše. Evo napraviti ćemo pauzu pet minuta, a na kraju provjerite google. Samo mi dajte činjenice.

ADNAN ABADŽIJA - vijećnik NIP-a

Ja sam ovo što su oni jedan drugom replicirali mislio da kažem kratko i brzo ispred KV NIP-a i želim da ne kršim ustavnost i zakonitost ove države. U Statutu Općine Ilijaš član 45. ne bih da prekršim, Ustav KS diktira tako i tako, a popis stanovništva iz 1991. godine je važeći i to ćemo u narednom periodu provjeriti i molio bih sekretaricu, ako može, da nam nađe u Ustavu koji je važeći popis stanovništva u BiH i na kojem nivo. Ako nećete vi, evo mi ćemo izaći i tražim pauzu od petnaest minuta da provjerimo i da mi ne kršimo ustavnost i zakonitost akata ove Općine, Kantona, Federacije i Bosne i Hercegovine.

ALMA OMEROVIĆ - predsjedavajuća

Kolega hoćete li da vam sekretarka odmah pročita ili ćete na pauzu.

ADNAN ABADŽIJA - vijećnik NIP-a

Pauza od petnaest minuta.

ALMA OMEROVIĆ - predsjedavajuća

Dajem petnaest minuta pauze na zahtjev KV NIP-a (11:50-12:05h).

ALMA OMEROVIĆ - predsjedavajuća

I dalje smo na tački 4.a). Izbor predsjedavajućeg Općinskog vijeća Iljiaš. Kolege su imale potrebu da sekretarka pripremi član koji će pročitati, a nakon toga se javio kolega Abadžija za riječ i po Poslovniku, kolega možete govoriti u ime Kluba vijećnika, odnosno predsjednika Kluba.

ADNAN ABADŽIJA - vijećnik NIP-a (ispravka krivog navoda)

Nisam se javio za riječ.

ILDA KAHRIMAN - sekretar Općinskog vijeća

Poglavlje VI gdje stoje Općinske vlasti piše:

Općina ima općinsko vijeće i općinskog načelnika.

Mandat članova općinskog vijeća i općinskog načelnika je četiri godine.

Općinske vijećnike i općinskog načelnika biraju, demokratskim putem, birači na neposrednim i tajnim izborima na cijelom području općine, na način utvrđen zakonom.

Svaki birač u skladu sa zakonom može biti biran za općinskog vijećnika ili za općinskog načelnika.

Općinski načelnik i predsjedavajući općinskog vijeća u općinama ili općinskim vijećima višenacionalnog sastava ne mogu biti iz reda istog konstitutivnog naroda, odnosno iz reda Ostaih, izuzev u onim općinama u kojima jedan konstitutivni narod čini više od 80% stanovnika, prema posljednjem popisu stanovništva u Bosni i Hercegovini.

ALAN ŠERAK - vijećnik SDP-a (ispravka krivog navoda)

Prvo, da li je to zvanični dokument? Druga stvar, da li je to što si pročitala zvanični dokument i druga stvar, kada je to došlo do izmjena Ustava Federacije BiH.

ILDA KAHRIMAN - sekretar Općinskog vijeća

Ovo je sa njihove stranice. Evo piše Ustav Federacije BiH objavljen u Službeni novinama Federacije BiH AMANDMAN I ("Sl.novine FBiH", broj:1/94), pa onda ima da je preambula Ustava promijenjena amandmanima tim i tim do zadnjeg AMANDMANA CIX ("Sl.novine FBiH", broj: 88/08).

HALID DIZDAREVIĆ - vijećnik SDA

Mi se nalazimo na tački 4.a) Izbor predsjedavajućeg Općinskog vijeća i dostavili smo prijedloge. Određena grupa vijećnika smatra da ova Odluka nije ustavna i mi se ne nalazimo na tački koja govori o tome šta je ustavno, a šta nije i ne nalazimo se na tački

pretresanja određenih ustavnih Odluka. Trebali smo se svi pripremiti za ovu sjednicu i imati to u vidu. Sada kada je Ilda pročitala, smatram da svi trebaju donijeti određenu Odluku. Ko smatra da je ustavna neka glasa na osnovu pristiglih prijedloga. Mi nismo tražili izjašnjenje niti jednog kandidata koji su predloženi i cijenim da treba da idemo u pravcu dnevnog reda i tačke koju sada diskutujemo, a to je izbor predsjedavajućeg općinskog vijeća.

ALAN ŠERAK - vijećnik SDP-a (replika)

Imam potrebu jednostavno iz razloga i ne znam kako da se izrazim, ali razočarao si me Halide svojim neznanjem. Ja ovdje osporavam zakonitost donošenja ove vrste odluke. Ti sad meni pričaš je li to po Ustavu ili nije. Pa normalno da moramo voditi računa o tim stvarima. Osporavam dakle zakonitost samog prijedloga ako do istog dođe, ali možda griješim. Evo opet ću napomenuti. Nije ništa sporno, imate parlamentarnu većinu i izaberite predsjedavajućeg, ali ja vas molim da to bude u skladu sa važećim propisima ove države. Ništa drugo ne tražim i o tome se radi. I sad ćeš ti meni reći nije to tačka dnevnog reda. Kako da nije. Raspravljamo konkretno o konkretnim stvarima i osporavamo zakonitost samog prijedloga. Opet kažem, možda griješim. Ne ulazim kako se ko izjasnio, iz kojeg povoda se izjasnio i svako ima pravo, ali isto tako se to nama mora saopštiti ovdje da ne napravimo grešku, da ne glasamo protiv ustavne odredbe, jel smo maločas svi položili zakletvu po tom pitanju. To je suština i vjerujte mi ja sve vrijeme ovo govorim dobronamjerno. Nemojte molim vas da se mi ne razlikujemo sa nekim snagama koje razvaljuju ovu državu i da radimo iste postupke. Ako ćemo se i mi tako ponašati, bojim se da onda ova država nema budućnosti. Stvarno se bojim. Ili ćemo je praviti kako treba na "zdravim nogama" ili je nećemo nikako praviti, dajte onda da se razidemo. Ne treba nam, bukvalno nam ne treba, da se ne zamaramo ovim teškim temama.

HALID DIZDAREVIĆ - vijećnik SDA (replika)

Molim vas predsjedavajuća nemojte ubuduće neformalno razgovarati sa vijećnicima i nisam završio. Ja sam se javio za repliku kolegi Šeraku i između tog mog javljanja vi ste se nakon toga očitavala sa vijećnicima koji nisu dobili riječ. Jesam li upravu?

ALMA OMEROVIĆ - predsjedavajuća

Upravu ste. Izvolite.

HALID DIZDAREVIĆ - vijećnik SDA (replika)

Kolega Šerak je rekao da je iznenađen mojim neznanjem, a onda je nakon toga opet rekao da možda i on griješi. Dakle, ovdje se očigledno radi o slijedećem: ovo što je Ilda pročitala je sasvim jasno meni i većini vijećnika. Ja sam rekao da je tačka dnevnog reda 4.a) izbor predsjedavajućeg i imamo dva prijedloga. Ukoliko neko smatra, a evo da ja smatram da nije ustavno, ne bih glasao za to da ne snosim određene konsekvence i posljedice. Ukoliko neko smatra da će snositi određene konsekvence zbog određenih naših odluka koje se mogu preispitati na instancama naše države, koju svakako svi cijenimo, u tom pravcu treba da idemo.

ALMIR ŠPIODIĆ - vijećnik NIP-a (replika)

S obzirom na iskustvo kolege Dizdarevića kroz rad općinskog vijeća, mislim da on poznaje dovoljno procese. Imamo pravo da sumnjamo, imamo pravo da ne znamo, a isto tako imamo pravo na informaciju. Ja sam tražio informaciju da znam i mislim da mi koji biramo nekoga ovdje da imamo pravo da znamo kako se izjašnjavaju naši kandidati koji su kandidati za predsjedavajućeg općinskog vijeća.

HALID DIZDAREVIĆ - vijećnik SDA (poslovnička intervencija)

Cijenim diskusiju s tim da kad kažete da imate pravo da znate nečiju nacionalnost, po kojoj tački Poslovnika imate to pravo, recite.

ALAN ŠERAK - vijećnik SDP-a (poslovnička intervencija i krivi navod)

Kako vi mislite da mi glasamo za nešto o čemu ne znamo i na taj način nas tjerate da kršimo zakone ove države?

ALMIR ŠPIODIĆ - vijećnik NIP-a (replika)

Da završim misao, pa neka Halid traži po Statutu gdje imamo pravo. Ja mislim da imamo pravo znati iz razloga ako se primjenjuje i ako zvanično dobijemo informaciju da se primjenjuje popis stanovništva iz 2013. godine, ja stvarno želim da mi izaberemo Bošnjaka za predsjedavajućeg općinskog vijeća. Ne želim ni u kom slučaju da izaberemo iz reda Ostalih nacionalnih manjina, ako se primjenjuje popis iz 2013. godine. Međutim, ako se primjenjuje popis stanovništva iz 1991. godine, ne želim da to kršim, želim samo da postupim onako kako piše na bazi činjenica i dokumentacije. Još što sam htio da kažem vezano za ove pauze, mislim da bi Stručna služba općinskog vijeća i općinskog načelnika trebala obezbjediti prostoriju kada tražimo pauzu za konsultacije da imamo prostoriju i da se ne konsultujemo na stubištu, pa nas ljudi tamo prisluškuju i stvaramo lošu sliku. Mislim da bi nam trebalo obezbjediti neku prostoriju gdje se mi možemo sastati i vršiti konsultacije.

ALMA OMEROVIĆ - predsjedavajuća

Ja ću nešto na kraju dodati kada kolega Abadžija završi.

ADNAN ABADŽIJA - vijećnik NIP-a (replika)

Ja mislim da smo se mi svi dobro pripremili za ovu sjednicu i stojima iza toga, ali u svečanoj zakletvi smo ovdje rekli da ćemo se pridržavati Ustava i Zakona, prvo Bosne i Hercegovine, pa tek onda Federacije BiH, općine i ostalih podzakonskih akata koje imamo na nivou općine. Molim vas, sekretaru jeste li nam pročitali detalj iz Federalnog dijela tj. je li to iz Ustava Federacije BiH ili Bosne i Hercegovine.

ILDA KAHRIMAN - sekretar

Pročitala sam iz Ustava Federacije BiH.

ADNAN ABADŽIJA - vijećnik NIP-a (replika)

Molim vas da uzmete Ustav i Zakon BiH, jer je to krovni Ustav i Zakon iz kojih svi ostali proizilaze. Znači, ne možemo mi uzeti Ustav ili Statut mjesne zajednice, pa prema njemu krojiti ovaj dio.

ILDA KAHRIMAN - sekretar

Ja mislim da sam dovoljno pročitala. Imamo Federalni i Kantonalni Ustav i ako bi sad sve redom ovdje čitali, tome ne bi bilo kraja.

ALMIR ŠPIODIĆ - vijećnik NIP-a (replika)

Kolega Abadžija i ja sam zbunjen ovim što vi govorite. Ustav Kantona Sarajevo član 37. nam govori jedno, Ustav Federacije BiH nam govori drugo i ako ima član Ustava BiH možda se i on ne slaže. Sada sam baš zbunjen i ne znam kako bih postupio.

ALEMA DŽAFO - vijećnica NIP-a

U Ustavu Kantona Sarajevo u članu 27. je navedeno da se popis stanovništva iz 1991. godine poštuje sve do implementacije Aneksa 7. Dejtonskog mirovnog sporazuma. To se odnosi i na nacionalnu pripadnost predsjedavajućeg i dopredsjedavajućeg.

ADNAN ABADŽIJA - vijećnik NIP-a (replika)

Ovdje vidite da je ovaj detalj izvučen iz Ustava i Zakona Bosne i Hercegovine i mislim da bi trebali to da nađemo, jer je to krovna instanca naše lijepe domovine, a biće mi čast da mi izaberemo Bošnjakinju za predsjedavajuću općinskog vijeća ukoliko ne bude ostalih.

ALEN HASKOVIĆ - zamjenik predsjedavajućeg (replika)

Molim vas, cijeneći vašu diskusiju i vaše replike, mislim da smo pročitali sve članove koji su bili u Ustavu Kantona Sarajevo i Ustavu Federacije BiH, upoznali se sa njima kao organ općinskog vijeća i ne vidim među nama nikoga dovoljno kompetentnog da on kaže da je nešto po Zakonu ili nije. Dakle, svi ste primili na znanje ono što je Ilda pročitala, imate prijedloge za predsjedavajućeg općinskog vijeća i predlažem da Komisija za izbor i imenovanja, ukoliko nema drugih prijedloga pripremljenih, pripremi zakonitost naše odluke, naravno ako se vi odlučite na to, ja vas pozivam i nije nikakav problem. Dakle, mi nismo kompetentni da kažemo da je nešto po Zakonu ili nije.

ALMIR ŠPIODIĆ - vijećnik NIP-a (replika)

Ja zaista ne mogu da učestvujem u nečemu gdje zamjenik predsjedavajućeg kaže "ja mislim" i na osnovu njegovog ličnog mišljenja, meni ništa govori. Da li vi mislite ili ste sigurni na osnovu činjenica, ja bih volio da nam to objasnite, ali na osnovu nečijeg mišljenja ja ne mogu donositi odluke i učestvovati u nečemu što ja sumnjam da nije u skladu sa propisima i Ustavom Kantona Sarajevo, a prije svega Ustavom Federacije BiH i Bosne i Hercegovine.

ALMA OMEROVIĆ - predsjedavajuća

Molim vas budite malo glasniji i upečatljiviji, govorite sebi.

ADNAN ABADŽIJA - vijećnik NIP-a (replika)

Da vas pitam gdje govorim sebi.

ALMA OMEROVIĆ - predsjedavajuća

Ne govorite u mikrofon, na to sam mislila i molim vas nemojte me tako ispitivati, nisam ja ovdje na testu kod vas, nego hajde replicirajte.

ADNAN ABADŽIJA - vijećnik NIP-a (replika)

Nemojte me prekidati, molim vas.

ALMA OMEROVIĆ - predsjedavajuća

Ja sam predsjedavajuća, ja vodim sjednicu, izvolite replicirajte.

ADNAN ABADŽIJA - vijećnik NIP-a (replika)

Nemojte me prekidati, evo repliciram na govor zamjenika predsjedavajućeg. Nemojte reći da nismo kompetentni, a 15 miliona budžet i tada ćemo biti kompetentni. Ako nismo kompetentni mi ćemo sada da saznamo iz propisa i akata i onda ćemo postupiti po tome. Nemojte da postupamo po nečijem mišljenju i po nečijem nalogu. Ako je po nalogu, vi "bujrum", a mi "doviđenja i prijatno".

ALEN HASKOVIĆ - zamjenik predsjedavajućeg (replika)

Sekretar nam je pročitao članove Ustava različitog nivoa vlasti. Ako oni nekome nisu jasni, to je zaista njegov problem. Mi moramo nastaviti proceduru izbora predsjedavajućeg.

ADNAN ABADŽIJA - vijećnik NIP-a (ispravka krivog navoda)

Niste nam pročitali član iz Ustava Bosne i Hercegovine.

ALAN ŠERAK - vijećnik SDP-a

Kada se traži ispravka krivog navoda, ne daje mu se odmah riječ, nego kada govornik završi.

ALMA OMEROVIĆ - predsjedavajuća

Misim da je kolega bio završio.

ALEN HASKOVIĆ - zamjenik predsjedavajućeg (replika)

Zaista, sekretar općinskog vijeća je pročitao sve članove koji se tiču izbora

predsjedavajućeg, konstitutivnosti naroda i o čemu bi mi sve trebali voditi računa. Ako nekome zaista nije jasno, onda neka potraži autentično tumačenje i podnese apalaciju Ustavnom sudu. Nama je uputpunosti jasno šta piše u tim Zakonima, cijenim da smo dali ustavan prijedlog, a vi ako imate sumnje, ja vam ponavljam da, nakon provedene procedure izbora predsjedavajućeg, imate mogućnost da podnesete apelaciju Ustavnom sudu i preispitate zakonitost naše Odluke. Zaista niste vi ti koji možete reći nešta da je ovaj organ donio neku Odluku zakonito ili nezakonito. Vi to mišljenje tražite od Ustavnog suda. Pozivam kolege, parlamentarne grupe, ako ima još neko neki prijedlog da ga dostavi i ako nema da predsjednik Komisije za izbor i imenovanja zajedno sa sekretarom napravi izborne listiće i da nastavimo ovu proceduru.

ALMIR ŠPIODIĆ - vijećnik NIP-a (replika)

Hvala, Alen to zaista nama fino objasni, samo sam ja zbunjen, ponovo kažem. Pročitali smo više članova i Zakona gdje nam se ne poklapaju ili ne podudaraju član 37. Ustava Kantona Sarajevo sa ovim što nam je sekretar pročitao. Sada ovo izgleda kao što sam negdje pročitao i neko reče da se ljudi ponašaju kao na švedskom stolu. Mislim da je neko rekao za Dejtonski morovni sporazum, pa uzimaju šta im treba, šta im ne treba. Ja ne želim tako da se ponašam. Ja želim da uzmem ono što je ispravno sa tog švedskog stola, mislim da uzmem i da primjenim zakon koji je validan. Čini mi se da svi mi se nismo dobro pripremili za ovu sjednicu vijeća poštovani kolega Haskoviću i sad ja bih da primijenimo član 37. Ustava Kantona Sarajevo, a vi bi da primijenite neki drugi član koji nije ažuriran, a evo sekretarka je rekla da nije zvaničan, ako sam dobro čuo. Dobro, zvaničan je.

MUHAMED HANDŽIĆ - vijećnik SBB-a (replika)

Mi raspravljamo nečemu što nije nama dostupno. Naš Ustav je Statut Općine Ilijaš i evo ga hoćemo primjenjivati. Na Odluci o izboru predsjedavajućeg općinskog vijeća nigdje se ne pominje niti jedan Ustav, ni jedan drugi akt izuzev Poslovnika Općinskog vijeća Ilijaš i njegovog člana 47. i 55. tačka 5. Neko je rekao nismo se pripremili, a neko je rekao dobro smo se pripremili za ovu sjednicu vijeća. Onaj ko se dobro pripremio uredu je, onaj ko se nije pripremio, trebao se pripremiti za vijeće, pročitati član 47. i član 55. tačka 5. i na osnovu toga mi donosimo svoju ličnu odluku o izboru predsjedavajućeg općinskog vijeća. Svi mi za sebe odgovaramo u ovom slučaju, kršimo li Ustav, kršimo li Zakon ili ne. Ja sam spreman snositi sve konsekvence kada je u pitanju moja lična odluka. Ako pogriješim u sastavu bilo koje manjine ili većine, kako već, ja ću odgovarati za to. Ja se isključivo držim Statuta Općine Ilijaš i on je meni jedini regulivni dokument. Dalje, da pojasnim još jedno. Hijerarhijski, obzirom da sam ja bio vojnik čitav svoj vijek, nikada nisam naređivao vojniku kao komandant, nego sam imao komandira čete, komandira voda, pa komandira desetine i on prenese vojniku njegov zadatak. Dakle, ovdje je jasna situacija. Mi imamo Ustav države, Ustav Federacije i znači imamo Ustave svih ovih nivoa i dolazimo do Statuta Općine Ilijaš koji je nama jedini regulativni akt i ispod njega je Poslovnik o radu općinskog vijeća. Prema tome, ljudi o čemu mi pričamo. Mi se bavimo državnim Ustavom, Federalnim, Kantonalnim, a trebamo se baviti ovim.

ALMIR ŠPIODIĆ - vijećnik NIP-a (replika)

Zaista kolega Handžić, kao i u prethodnom sazivu vijeća, ima korektnu diskusiju da nas usmjeri na pravi tok sjednice i to zaista cijenim i upravu ste. Trebamo se držati Statuta

Općine Ilijaš, prije svega, uz poštivanje Ustava većih nivoa vlasti. Koliko se sjećam sekretarka nam je pročitala član 47. Statuta Općine Ilijaš preko kojeg se i poziva ova Odluka o izboru predsjedavajućeg općinskog vijeća, a tamo isto kaže ovo što smo mi spominjali tj. da se vodi računa da načelnik i predsjedavajući općinskog vijeća ne budu iz reda istog konstitutivnog naroda ili reda ostalih, ako je općinsko vijeće višenacionalnog sastava. Iz tog razloga, kako ćemo mi znati i voditi računa, ako ne znamo kako su se naši kandidati izjasnili. Ne znam zašto je uopšte problem da makar članovi Komisije za izbor i imenovanja koji provode izborni proces znaju kako su se predloženi članovi izjasnili.

ALMA OMEROVIĆ - predsjedavajuća

Za riječ se javio Alan Šerak, u ime Kluba, druga diskusija. Da li uzimate riječ u ime Kluba?

ALAN ŠERAK - vijećnik SDP-a

Ne, nego u svoje ime.

ALMA OMEROVIĆ - predsjedavajuća

Ne možete. Jednom ste već diskutovali, a sada možete kao šef Kluba uzeti riječ za diskusiju.

ALAN ŠERAK - vijećnik SDP-a

Je li tako stoji u Poslovniku o radu OV-a?

ALMA OMEROVIĆ - predsjedavajuća

Tako je, u Poslovniku o radu OV-a.

ALAN ŠERAK - vijećnik SDP-a

Koji član Poslovnika?

ALMA OMEROVIĆ - predsjedavajuća

Izmjene i dopuna Poslovnika OV-a Ilijaš član 75. stav 2. mijenja se i glasi: "Vijećnik po jednoj tački dnevnog reda ima pravo na jednu diskusiju u trajanju od pet minuta, a predsjednik kluba ili šef kluba vijećnika u trajanju od osam minuta".

ALAN ŠERAK - vijećnik SDP-a

Zamoliti ću vas svakako da malo uvedete reda u radu ove današnje sjednice. Dobio sam riječ, javio sam se za diskusiju i zamolio bih uvažene kolege da me saslušaju, jer me stvarno iritira kada neko ovdje izlaže nešto i onda mu se ubacuju, ometaju ga, a evo nakon silnog čekanja, zaboravio sam i šta sam želio kazati. Uvaženi kolega Handžiću vama čestitam na hrabrosti, pa ste svjesni i hrabri da želite na sebe da preuzmete odgovornost ukoliko glasate za nešto što nije u skladu sa Zakonom. Ja vama čestitam, ali za razliku od vas, ja nisam spreman da preuzmem tu vrstu rizika i neću je preuzeti. Cijeli ovaj tok diskusije i rasprave po ovoj tački dnevnog reda je besmislen iz razloga ili se neko izjasnio

drugačije, pa to sada krije ili neko želi da mimo Ustava se izabere na nešto, pa ćemo onda to odugovlačiti. Dakle, reći ću vam zvanično stav KV SDP-a po ovom pitanju: ukoliko mi se ne saopšti da su ispunjeni svi kriteriji proizašli iz člana 47. Statuta Općine Ilijaš, SDP u ovoj vrsti lakrdije, negiranje ustavnih i statutarnih odredbi, naravno neće učestvovati, jer mi imamo barem minimum odgovornosti naspram ove lokalne zajednice i zakonitosti koje donosi ovaj organ koji se zove Općinsko vijeće. Dakle, ukoliko se nama ne saopšti je li ispoštovan član 47. Statuta Općine Ilijaš, mi ćemo se izuzeti iz glasanja, jer ne želimo da učestvujemo u ovom sramotnom činu koji ste vi ovdje proizveli.

ADNAN ABADŽIJA - vijećnik NIP-a (replika)

Ovo je demokratsko društvo gdje ćemo mi poštovati sve što je zakonom propisano. Predložio je kolega Handžić da idemo sa članom 47. Statuta Općine Ilijaš koji je naš prvi dokument i da provedemo ovaj izbor po pitanju izbora predsjedavajućeg i zamjenika predsjedavajućeg općinskog vijeća da uradimo ovaj izbor u skladu sa članom 47. koji je decidan po tom pitanju. Kako ćemo mi znati ko je šta ovdje. Da li je neko Srbin, Hrvat, Bosanac, Hercegovac itd. iz reda Ostalih, a moja želja je da bude Bošnjakinja. Kao što je u Višegradu predsjednik skupštine Muamer Sofović iz NIP-a, ispred svih odbornika on je izabran za predsjednika skupštine.

ALMIR ŠPIODIĆ - vijećnik NIP-a (replika)

Ja sam maloprije govorio da svi mi imamo svoje želje, ali nažalost, ovdje ih ne možemo provoditi, ovdje moramo poštovati propise. Evo, ako se slažu ostale kolege, kao što je kolega Handžić predložio da poštujemo član 47. Statuta Općine Ilijaš, naravno da nas upoznate da li su, kao što je kolega Šerak govorio, ispunjeni svi uslovi člana 47. Statuta Općine Ilijaš za provođenje izbora.

ALMA OMEROVIĆ - predsjedavajuća

Zatvaram raspravu po tački 4.a) dnevnog reda. Uslovi su ispunjeni, pravimo pauzu od petnaest minuta (12:31-12:46h).

Zamoliti ću Komisiju za izbor i imenovanja i predloženu Komisiju za provođenje izbora da pristupi pripremi materijala za glasanje i da nakon pauze od petnaest minuta pristupimo glasanju.

Pauza do 12:46h.

ALMA OMEROVIĆ - predsjedavajuća

Zamoliti ću predsjednika Komisije za izbor i imenovanja da podnese Izvještaj da li su se stekli uslovi za izbor predsjedavajućeg općinskog vijeća.

MEHMED SINANOVIĆ - predsjednik Komisije za izbor i imenovanja

Na osnovu člana 20. Poslovnika OV-a Ilijaš ("Službene novine Kantona Sarajevo", br.2/10, 18/15 i 7/19), a u vezi sa Ustavom, Zakonom, Statutom Općine Ilijaš, uz prethodne konsultacije sa predstavnicima političkih stranaka zastupljenih u Općinskom vijeću Ilijaš u mandatnom periodu 2020.-2024. godina, Komisija za izbor i imenovanja konstatuje da su se stekli uslovi za izbor predsjedavajućeg i zamjenika predsjedavajućeg Općinskog

vijeća Ilijaš.

Kako je utvrđeno članom 21. Poslovnika OV-a Ilijaš, izbor predsjedavajućeg i zamjenika predsjedavajućeg općinskog vijeća vrši se tajnim glasanjem iz reda izabranih vijećnika, u skladu sa Statutom i odredbama naprijed navedenog Poslovnika koje se odnose na izbor i imenovanje. Nadalje, shodno odredbama člana 58. stav 3. Poslovnika Općinskog vijeća Ilijaš, glasanje provodi i rezultate utvrđuje Komisija iz reda vijećnika sastavljena od predsjednika i dva člana koje smo već imenovali kao Općinsko vijeće.

Komisija za izbor i imenovanja, na osnovu pristiglih prijava, konstatuje i informiše da su predloženi kandidati za predsjedavajućeg: Alma Omerović i Selma Barić. Glasanje se vrši na način zaokruživanja broja ispred ponuđenog imena.

ALMIR ŠPIODIĆ - vijećnik NIP-a

Imam pitanje za predsjednika Komisije za izbor i imenovanja. Da li ste upotpunosti sigurni da je ispoštovan član 47. Statuta Općine Ilijaš koji se odnosi da se vodi računa o nacionalnoj zastupljenosti članova vijeća prilikom izbora i imenovanja, da li imate izjašnjenje kandidata iz kojeg reda naroda su kandidati?

MEHMED SINANOVIĆ - predsjednik Komisije za izbor i imenovanja

Kada je u pitanju Komisija za izbor i imenovanja, mi smo na osnovu pristiglih prijava, odnosno konsultacija stranaka, kandidirali imena koja su predložena za predsjedavajućeg općinskog vijeća. Mi, kao Komisija, nismo razmatrali, niti trebamo razmatrati konstutivnost i ostale stvari.

ALMIR ŠPIODIĆ - vijećnik SDP-a

Zatražio je repliku.

ALMA OMEROVIĆ - predsjedavajuća

Ne možete replicirati kolegi koji podnosi Izvještaj. Zamolit ću predsjednika, uslovi su se stekli i izvolite.

ALAN ŠERAK - vijećnik SDP-a (poslovnička intervencija)

Dakle, zamolit ću vas u budućnosti da takvu glupost više ne izjavljujete da neko nekome ne može replicirati na prijedlog nekog rješenja, odluke ili čega već. Čovjek je napravio Izvještaj i ovo je njegov Izvještaj o prijedlogu i gospodin Špodić ima pravo da mu replicira na tu priču. Ja stvarno ne razumijem te stvari. Gospodin Špodić, po Poslovniku, ima pravo dva puta da replicira gospodinu Sinanoviću koji je sada ovdje u ulozi i funkciji predsjednika Komisije koja nas izvještava o preduzetim aktivnostima.

ALMIR ŠPIODIĆ - vijećnik NOP-a (replika)

Ja želim da obavijestim Općinsko vijeće i Komisiju za izbor i imenovanja da ja neću učestvovati u Komisiji koja će sprovoditi izbore zato što nisam dovoljno informisan. Tražim da se izuzmem iz ove tačke dnevnog reda i dok vi provedete izbore, ja ću sačekati vani.

ALMA OMEROVIĆ - predsjedavajuća

Vi ste kolega već učestvovali u ovoj Komisiji i trebali ste se unaprijed izjasniti.

ALMIR ŠPIODIĆ - vijećnik NIP-a (krivi navod)

ALMA OMEROVIĆ - predsjedavajuća

Zatvorili smo diskusiju po pitanju ove tačke dnevnog reda i Komisiji za provođenje izbora dajem riječ.

ALAN ŠERAK - vijećnik SDP-a (poslovnička intervencija)

Obzirom da vi i dalje želite da derogirate određene stvari ovdje, a mi sve vrijeme upozoravamo da nam napravite prijedlog u skladu sa članom 47. Statuta Općine Ilijaš. Vi ste se od toga oglašili, te ja lično i KV SDP-a nećemo učestvovati u nečemu što je protuustavno i samim tim protuzakonito. Dakle, ja pozivam sada svoj Klub da mi napustimo rad današnjeg Vijeća, vi se gospodo izaberite onako kako ste izrežirali, a do određenih informacija ćemo svakako doći kada budemo pokrenuli apelaciju kod Ustavnog suda.

ADNAN ABADŽIJA - vijećnik NIP-a (poslovnička intervencija)

Također smo i mi zahtijevali da se ispoštuje iz Statuta Općine Ilijaš, po riječima Handžića, član 47. i da nam približite detalje, za koga ću ja danas glasati ne znam, jer u prijedlogu imam samo ime i prezime, te pozivam KV NIP-a da i mi napustimo sjednicu i nećemo prisustvovati ovoj lakrdiji.

ALMA OMEROVIĆ - predsjedavajuća

Zamoliti ću predsjednika Komisije za provođenje izbora Alena Haskovića da iznese upute kolegama u sali koji će učestvovati u ovom izbornom procesu, a nakon što kolege iz SDP-a i NIP-a napuste sjednicu.

ALEN HASKOVIĆ - predsjednik Komisije za provođenje izbora

Prije nego što kolege napuste sjednicu, želio bih reći da je predsjednik Komisije za izbor i imenovanja iznio prijedloge za izbor predsjedavajućeg i pročitao rečenicu "u skladu sa članom 47. Statuta Općine Ilijaš". Iznio vam je prijedloge i ne možete govoriti da ne znate za koga ćete glasati. Imate dva prijedloga.

ALMA OMEROVIĆ - predsjedavajuća

Alene, zamolit ću te da daš upute za glasanje. Kolege koje žele da glasaju, da pristupe glasanju. Evo predsjednik će izdavati glasačke listiće, a sekretar će imenom i prezimenom prozivati vijećnike i zamolit ću kolege koji napuštaju sjednicu da to učine što prije, da ne ometaju rad sjednice.

U 12:55 h sjednicu su napustili slijedeći vijećnici: Vernesa Bešlija, Almir Špiodić, Kenan Buza, Dino Čustović, Adnan Abadžija, Amina Ramić, Meho Hido, Alema Džafo, Alan

Šerak, Anela Subašić i Selma Barić.

ALMA OMEROVIĆ - predsjedavajuća

Obzirom da su kolege iz KV NIP-a i KV SDP-a najavili da napuštaju sjednicu, kolega Almir Špiodić koji je kao član bio izabran u Komisiju za provođenje izbora za predsjedavajućeg i zamjenika predsjedavajućeg, predlažem da se taj član zamjeni, te umjesto njega predlažem nekoga od kolega koji su prisutni na sjednici. Predlažem Adema Alića. Općinsko vijeće je predložilo Zaključak da se član Komisije za provođenje izbora za predsjedavajućeg i zamjenika predsjedavajućeg Almir Špiodić zamjeni, te umjesto njega izabere Adem Alić.

Općinsko vijeće je jednoglasno donijelo navedeni Zaključak.

ANEL BUMBULOVIĆ - vijećnik SDA

Atmosfera je malo napeta. Za riječ sam se bio javio dok su i ostale kolege vijećnici bili prisutni u sali da iznesem svoje mišljenje, ali tako je kako je. Zaista, nakon ove kompletne iscrpne rasprave, ja nisam pravnik i ni jedna niti druga strana mene nije ubijedila da je u pravu ili da je u krivu. Shodo tome, poštujem rad Komisije za izbor i imenovanja i vjerujem i cijenim da je ona donijela Odluke na osnovu informacija koje postoje i da su one ispravne i kao tako, prisustvovat ću glasanju, ali niko me nije ubijedio da je ovo ispravno ili da je ono ispravno. Neko od kolega mene sada poziva na neku odgovornost, ali naravno mi imamo Komisije koje su zadužene za rad i ja poštujem svaki organ općine i Komisije. Oni su iznijeli svoje pozitivno mišljenje što nači da možemo nastaviti sa radom. Kome se ne sviđa i ko želi još dodatne informacije, i ja ih želim, može da ih traži na pravom mjestu. Mislim da niko od nas ovdje nije kompetentan da tumači ni Ustav niti neke druge propise koji nisu u našem obimu rada.

Uslijedila je pauza od 12:10-12:30 h da se pripremi izborni materijal.

Nakon pauze, vijećnici su obavili tajno glasanje za predsjedavajućeg Općinskog vijeća Ilijaš, zatim je predsjedavajuća objavila da je glasanje završeno, te da se utvrde i objave rezultati glasanja.

Nakon završenog glasanja za predsjedavajućeg OV-a Ilijaš, predsjednik Komisije za izbor i imenovanja podnio je Izvještaj o rezultatima glasanja.

MEHMED SINANOVIĆ - predsjednik Komisije za izbor i imenovanja

Kandidat za predsjedavajućeg OV-a Ilijaš, gospođa Alma Omerović od ukupno 13 prisutnih vijećnika, dobila je 13 glasova, protiv nije bilo.

Kandidat za predsjedavajućeg OV-a Ilijaš, gospođa Selma Barić od ukupno 13 prisutnih vijećnika, dobila je 0 glasova.

Konstatovano je da je za predsjedavajućeg OV-a Ilijaš izabrana gospođa Alma Omerović.

ALMA OMEROVIĆ - predsjedavajuća

Ja moram ponoviti, na osnovu člana 158. Poslovnika o radu OV-a Ilijaš i Izvještaja Komisije za izbor i imenovanja da je za izbor predsjedavajućeg glasalo 13 vijećnika, toliko

je bilo i prisutno. Od toga, kandidatkinja Alma Omerović dobila je 13 glasova, a kandidatkinja Selma Barić nije dobila ni jedan glas. Također, nije bilo nevažećih glasačkih listića, te konstatujem da je prijedlog Alma Omerović izglasanja za predsjedavajuću Općinskog vijeća Ilijaš.

Zahvaljujem se svim kolegama i nadam se da ćemo u narednom periodu kvalitetno sarađivati na najbolji mogući način kako za ovo Vijeće, tako i za naše građane Općine Ilijaš. Vjerujem da ćete mi pomagati i da ćemo se truditi da budemo što bolji i da što kvalitetnije odluke donosimo.

4.b) Izbor zamjenika predsjedavajućeg Općinskog vijeća Ilijaš

ALMA OMEROVIĆ - predsjedavajuća

Zamoliti ću kolega da daju prijedloge za zamjenika predsjedavajućeg Općinskog vijeća Ilijaš.

MUHAMED HANDŽIĆ - vijećnik SBB-a

Prijedlog SBB-a za zamjenika predsjedavajućeg Općinskog vijeća Ilijaš je Akif Bešlija to ću vam dostaviti i u pisanoj formi.

ALMA OMEROVIĆ - predsjedavajuća

Obzirom da nema više pristiglih prijedloga, napraviti ćemo pauzu od petnaest minuta i zamoliti ću Komisiju za izbor i imenovanja i Komisiju za provođenje izbora da pripreme materijal za glasanje i da nam podnesu Izvještaj o pristiglim prijavama i onda ćemo krenuti u proceduru izbora zamjenika predsjedavajućeg Općinskog vijeća Ilijaš.

Pauza od 12:15-12:30h da se pripremi izborni materijal.

ALMA OMEROVIĆ - predsjedavajuća

Komisija je na pauzi pripremila izborni materijal za izbor zamjenika predsjedavajućeg Općinskog vijeća Ilijaš. Međutim, da ne bi napravili proceduralnu grešku, ovo što sam pročitala član 158. Poslovnika o radu OV-a Ilijaš i potvrdila rezultate Komisije za izbor i imenovanja samo ćemo još jednom potvrditi izbor predsjedavajuće Općinskog vijeća Ilijaš glasanjem za Odluku o izboru predsjedavajućeg Općinskog vijeća Ilijaš prema rezultatima koje je podnijela Komisija za izbor i imenovanja i koje sam ja potvrdila članom 158.

Zatim je Općinsko vijeće Ilijaš jednoglasno donijelo

O D L U K U

o izboru predsjedavajućeg Općinskog vijeća Ilijaš

I

Alma Omerović, bira se za predsjedavajućeg Općinskog vijeća Ilijaš.

II

Ova odluka stupa na snagu danom donošenja i objavit će se u "Službenim

novinama Kantona Sarajevo".

ALMA OMEROVIĆ - predsjedavajuća

Pozivam predsjednika Komisije za izbor i imenovanja da podnese Izvještaj da li su se stekli uslovi za izbor zamjenika predsjedavajućeg Općinskog vijeća Ilijaš.

MEHMED SINANOVIĆ - predsjednik Komisije za izbor i imenovanja

Na osnovu svih članova i procedura koje smo proveli za izbor predsjedavajućeg općinskog vijeća, iste te procedure i članove zakona smo koristili i za izbor zamjenika predsjedavajućeg općinskog vijeća. Komisija za izbor i imenovanja, na osnovu pristiglih prijava i konsultacija stranaka, drugih Klubova stranaka predlaže kandidate za izbor zamjenika predsjedavajućeg općinskog vijeća Akif Bešlija. Glasanje se vrši na način ZA ili PROTIV, zaokruživanjem ZA ili PROTIV vršite glasanje za zamjenika predsjedavajućeg općinskog vijeća.

Pozivam Komisiju za provođenje izbora da pristupi proceduri provođenja izbora.

ALMA OMEROVIĆ - predsjedavajuća

Komisija je spremna, a prethodno objasnili proces glasanja to važi i za zamjenika predsjedavajućeg, te pozivam Komisiju da pristupi provođenju procedure glasanja.

Potom su vijećnici obavili tajno glasanje za izbor zamjenika predsjedavajućeg Općinskog vijeća Ilijaš, a zatim je predsjedavajuća objavila da je glasanje završeno, te da se utvrde i objave rezultati glasanja.

ALMA OMEROVIĆ - predsjedavajuća

Pauza od 13:30-13:35 h da se pripremi Izvještaj o rezultatima glasanja za izbor zamjenika predsjedavajućeg.

MEHMED SINANOVIĆ - predsjednik Komisije za izbor i imenovanja

Komisija za izbor i imenovanja konstatuje da je za zamjenika predsjedavajućeg općinskog vijeća izabran Akif Bešlija, jer je dobio 13 glasova što je većina od izabranog broja vijećnika.

ALMA OMEROVIĆ - predsjedavajuća

Na osnovu člana 158. Poslovnika o radu OV-a Ilijaš i Izvještaja Komisije za izbor i imenovanja potvrđujemo da je kolega Akif Bešlija, kao kandidat za zamjenika predsjedavajućeg, dobio 13 glasova, nije bilo nevažećih glasačkih listića. Trinaest vijećnika je pristupilo glasanju i s tim u vezi potvrđujem da je predloženi kandidat dobio potrebnu većinu.

Zatim je OV-e jednoglasno donijelo

O D L U K U
o izboru zamjenika predsjedavajućeg Općinskog vijeća Ilijaš

I

Akif Bešlija, bira se za zamjenika predsjedavajućeg Općinskog vijeća Ilijaš.

II

Ova odluka stupa na snagu danom donošenja i objavit će se u "Službenim novinama Kantona Sarajevo".

ALMA OMEROVIĆ - predsjedavajuća

Zahvalila se na saradnji kolegi Alenu Haskoviću, na izuzetnoj podršci i doprinosu. S obzirom da sam na pola mandata preuzela poziciju predsjedavajuće, također koristim priliku da se zahvalim i svima vama koji ste bili u prethodnom mandatu sa kolegom Haskovićem i sa mnom, kolegi Mahiru Deviću koji je radio dvije godine i svim novoizabranim vijećnicima koji su dali podršku danas meni, kao predsjedavajućoj Općinskog vijeća Ilijaš i kolegi Akifu Bešliji za zamjenika predsjedavajućeg Općinskog vijeća Ilijaš. Alene od srca ti hvala, nastavljamo sarađivati i zaista je bila čast i privilegija imati te za kolegu zamjenika predsjedavajućeg.

AKIF BEŠLIJA - zamjenik predsjedavajućeg

Sve vas u sali srdačno selamim i pozdravljam, kao i građane Općine Ilijaš. Naravno, uz ove selame i pozdrave želim da čestitam Novu Godinu 2021. svima prisutnim i građanima Općine Ilijaš da u rahatluku i zdravlju je provedu u najboljem redu. Želim čestitati i svim izabranim vijećnicima u Općinskom vijeću Ilijaš, kao i predsjedavajućoj Almi Omerović. Naravno, čestitke i starom-novom načelniku Akifu Fazliću i da se zahvalim kolegi Haskoviću na dosadašnjem radu i korektnoj saradnji. Hvala još jednom.

ALEN HASKOVIĆ - vijećnik SDA

Želim se tebi predsjedavajuća zahvaliti na lijepim riječima i saradnji koja je bila jednom visokom nivou, da poželim sreću u budućem radu našem novom zamjeniku predsjedavajućeg gospodinu Akifu Bešliji i želim mu uspjeh, dobro zdravlje i dobru atmosferu. Hvala vam svima od srca i još jednom svima vam čestitam.

4.c) svečana izjava novoizabranog predsjedavajućeg i zamjenika predsjedavajućeg Općinskog vijeća Ilijaš

Predsjedavajuća OV-a Ilijaš Alma Omerović i zamjenik predsjedavajućeg OV-a Ilijaš Akif Bešlija dali su svečane izjave.

AD-5

Odluka o utvrđivanju prestanka mandata nosilaca funkcija u prethodnom mandatu Općinskog vijeća:

a) predsjedavajućeg Općinskog vijeća Ilijaš

Diskutanata po ovoj tački dnevnog reda nije bilo, pa je OV-e jednoglasno donijelo

O D L U K U
o utvrđivanju prestanka mandata nosilaca funkcija u prethodnom mandatu
Općinskog vijeća Ilijaš

I

Utvrđuje se da je prestala funkcija

Omerović Almi

predsjedavajućoj Općinskog vijeća Ilijaš, u mandatu 2016.-2020. godine, zbog isteka mandata.

II

Ova odluka stupa na snagu danom donošenja i objavit će se u "Službenim novinama Kantona Sarajevo".

b) zamjenika predsjedavajućeg Općinskog vijeća Ilijaš

Diskutanata po ovoj tački dnevnog reda nije bilo, pa je OV-e jednoglasno donijelo

O D L U K U

o utvrđivanju prestanka mandata nosilaca funkcija u prethodnom mandatu Općinskog
vijeća Ilijaš

I

Utvrđuje se da je prestala funkcija

Hasković Alenu

zamjeniku predsjedavajućeg Općinskog vijeća Ilijaš, u mandatu 2016.-2020.godine, zbog isteka mandata.

II

Ova odluka stupa na snagu danom donošenja i objavit će se u "Službenim novinama Kantona Sarajevo".

Nakon što je iscrpljen dnevni red, predsjedavajuća Alma Omerović zaključila je 1.Konstituirajuću sjednicu Općinskog vijeća Ilijaš u 13:40h.

Zapisničar:
Maida Habibović

PREDSJEDAVAJUĆA
OPĆINSKOG VIJEĆA ILIJAŠ
Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20794Q

